

# POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

*Pauru rü nüxŭ narümoxē ga yema yaxōgŭxŭ ga Dumaārŭ ĩānewa yexmagŭxŭ*

<sup>1</sup> Pa Chaueneēgŭx, choma i Pauru nixŭ i pexcèx chanaxümatŭxŭ i ñaã popera. Rü choma nixŭ i Ngechuchu ya Cristuarŭ duŭxŭ chiŭxŭ. Rü choma nixŭ ga Tupana choxŭ yaxuxŭ na choxŭ yamuxŭcèx na duŭxŭgŭmaã nüxŭ chixuxŭcèx i norŭ ore i mexŭ i tüxŭ maxēxēxŭ.

<sup>2</sup> Rü nuxcŭmaxŭchima Tupana nanamu ga norŭ orearŭ uruŭgŭ na naxümatŭgŭāxŭcèx ga norŭ ore i mexŭ. Rü yemaãcü tüxŭ nüxŭ nacüxēē ga ñaã ore i mexŭ.

<sup>3</sup> Rü ñaã ore i mexŭ rü tórŭ Cori ya Ngechuchu ya Cristuchiga nixŭ. Rü nüma rü woo Tupana Nane na yiŭxŭ, natŭrŭ duŭxŭgŭrŭŭ nabu ga yexguma ñoma ga naãnewa nanguxgu. Rü nuxcŭmaŭcü ga āēxgacŭ ga Dabítaa nixŭ.

<sup>4</sup> Natŭrŭ nümatama ya Ngechuchu rü üünecŭ nixŭ. Rü yexguma yuwa ĩnadaxgu rü Tupana tüxŭ nüxŭ nadauxēē na aixcŭma Nanexŭchi na yiŭxŭ. Rü nüxna nanaxã ga guxŭma ga pora.

<sup>5</sup> Rü Ngechuchu ga Cristugagu nixŭ ga chomaã namecŭmaxŭ rü choxŭ naxunetaxŭ ga Tupana na norŭ puracŭ chaxŭxŭcèx. Rü yemacèx Ngechuchuégagu choxŭ namu na

guxŭ i nachiŭānewa nŭxŭ chixuxŭcèx i norŭ ore na yaxŏgŭāxŭcèx i duŭxŭgŭ rŭ Tupanaga naxŭnŭēxŭcèx.

<sup>6-7</sup> Rŭ pema rŭ ta, Pa Dumacŭāxgŭx, rŭ ngēma duŭxŭgŭtanŭwa pengēxmagŭ yerŭ Tupanaāxŭ peyaxŏgŭ rŭ naga pexŭnŭē. Rŭ nŭma rŭ pexŭ nangechaŭ rŭ marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcèx rŭ ngēma norŭ duŭxŭgŭtanŭxŭ na pexŭgŭxŭcèx. Rŭ ņuxmax, Pa Chaueneēgŭ i Dumacŭāxgŭx, rŭ chanaxwèxe i nŭma ya Tanatŭ ya Tupana rŭ tŏrŭ Cori ya Ngechuchu ya Cristu pemaā namecŭmagŭ rŭ pexŭ narŭngŭxēēgŭ na meā pexŭ naxŭpetŭxŭcèx rŭ aixcŭma petaāēgŭxŭcèx.

*Pauru rŭ nŭxŭ nangŭchaŭ na ŭyadauāxŭ ga yema yaxŏgŭxŭ ga Dumawa yexmagŭxŭ*

<sup>8</sup> Rŭ ņuxma rŭ Ngechuchu ya Cristuégagu Tupanana moxē chaxā pexcèx, erŭ guxŭwama i guxŭ i naānewa rŭ duŭxŭgŭ nŭxŭ nixugŭgŭ na aixcŭma Cristuaxŭ peyaxŏgŭxŭ rŭ Tupanacèx pemaxēxŭ.

<sup>9</sup> Rŭ nŭma ya Tupana choxŭ nadau rŭ nŭxŭ nacuèx na aixcŭma guxŭguma pexcèx chayumŭxèxŭ. Rŭ yimaāxŭ nixŭ i guxŭma i chorŭ ngŭchaŭmaā chapuracŭxŭ rŭ nŭxŭ chixuxŭ i norŭ ore i mexŭ i Nanechiga.

<sup>10</sup> Rŭ guxŭguma nŭxna chaca na choxŭ ngēma namuxŭcèx rŭ ngēmaācŭ dŭxwa pexŭ ŭchayadauxŭcèx ega norŭ ngŭchaŭ yixŭgu.

<sup>11</sup> Erŭ aixcŭma choxŭ nangŭchaŭ na pexŭ chadauxŭ na pemaā nŭxŭ chixuxŭcèx i

Tupanaārū ore na aixcūma meã peyaxōgūxūcèx rü yexeraãcü peporaexūcèx.

12 Rū ngēxguma ngēmaãcü wūxiwa ingēxmagūgu, rü tá wūxichigü yigü tataãégūxēē rü yigūaxū tanangúchaūxēē. Erü choma rü tá nüxū chadau na ñuxãcü tórü Coriaxū peyaxōgūxū rü pema rü tá ta nüxū pedau na ñuxãcü chayaxōxū.

13 Pa Chaueneēgūx, chanaxwèxe i nüxū pecuèx na muēxpūxcūna pexū íchayadauxchaūxū, natürü ñuxmarüta rü choxū naguxcha. Natürü ngēma petanüwa chaxūchaū, erü chanaxwèxe na pemaã nüxū chixuxū i Tupanaārū ore yema toxnamana yexmagūxū ga duūxūgūmaã nüxū chixuxürü. Erü chanaxwèxe i ngēma duūxūgürü meã peyaxōgü na ngēmaãcü Cristuwe naxīxūcèx i ngēma petanūxūgü i ñuxma tama yaxōgūxū.

14 Rū aixcūma ngēma changuxchaū erü nūmatama ya Tupana choxū namu na guxū i duūxūgūmaã nüxū na chixuxūcèx i norü ore. Rū nanaxwèxe i duūxūgü i meã poperaxū icuáxūmaã nüxū na chixuxū rü duūxūgü i tama poperaxū icuáxūmaã ta nüxū chixuxū i ngēma norü ore. Rū ngēxgumarü ta nanaxwèxe na ngēma duūxūgü i cuèx nüxū ngēxmaxūmaã nüxū na chixuxū rü ngēma duūxūgü i taxuguma rüxīnūēxūmaã nüxū na chixuxū.

15 Rū ngēmacèx, Pa Chaueneēgü i Dumagu Āchiūgūxū, rü choma rü marü íchamemare na petanüwa na chaxūxū, na pemaã rü ta nüxū chixuxūcèx i Tupanaārū ore i mexū.

*Tupanaārū ore rü napora*

16 Rū taxucèxma naxcèx chaxãne i ngẽma ore i mexũ. Erũ ngẽma ore rũ napora, rũ ngẽmamaã nixĩ i napuracũxũ ya Tupana na guxãma ya yixema Cristuaxũ yaxõgũxe rũ tũxũ nangẽxmaxũcèx i maxũ i taguma gúxũ. Rũ ngẽma maxũ, rũ Yudíugücèxirachirẽx nixĩ, natürũ i ñuxma rũ guxũma i ngẽma tama Yudíugũ ixĩgũxũcèx rũ ta nixĩ.

17 Rũ ngẽma norũ orewa nixĩ i tamaã nüxũ yaxuxũ ya Tupana na tórũ õgaguxicatama yĩxũ na napèxewa imexũ. Erũ norũ ore i ùmatũxũwa rũ ñanagürũ:

“Rũ yixema tũmaãrũ õgagu Tupanapèxewa mexẽ,  
rũ tá tũxũ nangẽxma i maxũ i taguma gúxũ”,  
ñanagürũ.

### *Nagagutama nixĩ i duũxũgũ inapoxcuexũ*

18 Rũ nüxũ tadaugũ na Tupana daxũguxũ i naãnewa ne namuxũ i norũ poxcu i aũcũmaxũ naxcèx i guxũma i ngẽma duũxũgũ i tama naga ñnũexũ rũ chixexũ ügũxũ rũ ngẽma norũ chixexũmaã togũaxũ naguxchaxẽẽgũxũ na tama nüxũ nacuèxgũxũcèx i ngẽma ore i aixcũma ixĩxũ.

19 Rũ ngẽma duũxũgũ i chixexũ ügũxũ rũ meã nüxũ nacuèxgũchirẽx na ñuxãcũ yĩxũ ya Tupana yerũ nümatama ga Tupana rũ marũ nüxũ nüxũ nadauxẽẽ ga yema.

20 Rũ woo tama nüxũ idaugũgu ya Tupana, natürũ guxũma i tacũ i naxũxũwa nixĩ i nüxũ idaugũxũ. Rũ yexguma noxri naãne naxũxgumama nixĩ ga meãma duũxũgũxũ nüxũ nadauxẽẽxũ na aixcũma Tupana na yĩxũ rũ guxũguma na naporaxũ. Rũ ngẽmacèx i ngẽma

duŭxŭgŭ i chixexŭ ŭgŭxŭ, rŭ taxucŭrŭwama ŭacŭmaã nŭgŭ ĩnapoxŭgŭ i Tupanapĕxewa.

21 Yerŭ woo nŭxŭ nacuĕxgŭchirĕx na ñuxãcŭ yĩxŭ ga Tupana, natŭrŭ tama nanayauxgŭchaŭ na norŭ Tupana yĩxŭcĕx, rŭ bai na moxĕ nŭxna naxãgŭxŭ. Natŭrŭ yema ore ga taxuwama mexŭguama narŭxĩnŭĕ, rŭ yemaãcŭ naĕchitamare namaxĕ rŭ yexeraãcŭ chixexŭgu narŭxĩnŭĕ.

22-23 Rŭ nŭgŭ yaxugŭegu rŭ duŭxŭgŭ i nŭxŭ icuáxŭ nixĩgŭ natŭrŭ taxuguma narŭxĩnŭĕ. Yerŭ nŭxna nixĩgachitanŭ ga Tanatŭ ya Tupana ya mexĕchicŭ ya taguma yucŭ, na nawe naxĩxŭcĕx ga norŭ naxchicŭnĕxãgŭmare ga duŭxŭgŭ i yuxwĕxexŭchicŭnĕxãmare ixĩgŭxŭ rŭ werigŭchicŭnĕxãmare ixĩgŭxŭ rŭ naĕxŭgŭchicŭnĕxãmare ixĩgŭxŭ rŭ ãtapegŭchicŭnĕxãmare ixĩgŭxŭ.

24 Rŭ yemacĕx ga Tupana rŭ dŭxwa yemawa nanawogŭ ga yema duŭxŭgŭ na naxŭgŭãxŭcĕx ga guxŭma ga yema chixexŭ ga nŭxŭ ngŭchaŭgŭxŭ rŭ nŭgŭmaã na naxŭgŭãxŭcĕx ga naxŭneãrŭ ngŭchaŭgŭ i ãne tŭxna ãxŭ.

25 Rŭ yemaãcŭ nŭxna nixĩgachi ga guma aixcŭmaxŭchi Tupana ixĩcŭ na nawe naxĩxŭcĕx ga norŭ tupanagŭ ga tama aixcŭma ixĩgŭxŭ. Rŭ yema Tupana ŭxŭpĕxewa nayumŭxĕgŭ rŭ yemaxŭ nicuĕxŭŭgŭ, natŭrŭ tama nŭxŭ nicuĕxŭŭgŭ ga Tanatŭ ya Tupana ga naxŭcŭ rŭ inaxwĕxecŭ na guxŭguma nŭxŭ icuĕxŭŭgŭxŭ. Rŭ ngĕmaãcŭ yixĩ.

26 Rŭ yemacĕx ga Tupana rŭ dŭxwa yemawa nanawogŭ ga yema duŭxŭgŭ na naxŭgŭãxŭcĕx ga naxŭneãrŭ ngŭchaŭ i ãne tŭxna ãxŭ. Rŭ ĕixrŭŭ ga

ngexŭgŭ rŭ naxrŭŭ ngexŭgŭmaātama nangēāēgŭ  
rŭ tama yatŭgŭmaā.

27 Rŭ yexgumarŭŭ ta ga yatŭgŭ rŭ naxrŭŭ  
yatŭxŭmaātama nangēāēgŭ, rŭ tama ngexŭgŭmaā.  
Rŭ yema naxŭneārŭ ngŭchaŭ ga chixexŭgŭ rŭ  
nŭxŭ napora na naxrŭŭ yatŭxŭmaā namaxēxŭ.  
Rŭ yemaācŭ ga yema yatŭgŭ rŭ nŭgŭmaā  
nanaxŭgŭ ga yema naxŭneārŭ ngŭchaŭ i āne  
tŭxna āxŭ, rŭ dŭxwa yemagagu niḁaawee rŭ  
naturaxŭnegŭ.

28 Rŭ yema na tama Tupanaxŭ nacuēxgŭchaŭxŭ,  
rŭ yemacēx ga nŭma ga Tupana rŭ dŭxwa yemawa  
nanawogŭ ga yema duŭxŭgŭ na norŭ chixexŭgu  
na naxŭnŭēchaxŭcēx rŭ na naxŭgŭāxŭcēx ga yema  
chixexŭ.

29 Rŭ dŭxwa ga yema duŭxŭgŭ rŭ guxŭraŭxŭ  
ga chixexŭ naxŭgŭ ga Tupanapēxewa. Rŭ tama  
aixcŭma meā naxmēxmaā rŭ natemaā namaxē. Rŭ  
naxaŭ rŭ nŭgŭnaxŭcatama nananugŭchaŭ i guxŭma  
i ṭacŭ. Rŭ ṭoguāxŭ nachixexēēgŭchaŭ. Rŭ  
nixāŭxāchiwēxegŭ, rŭ namáētagŭ, rŭ nanuēwēxe,  
rŭ nawomŭxēēwēxegŭ, rŭ naxŭneārŭ ngŭchaŭ  
nŭxŭ napora, rŭ naxoregŭtèèxgŭ.

30 Rŭ chixexŭmaā ṭoguāxŭ nixugŭe, rŭ Tu-  
panachi naxaie, rŭ ṭoguāxmaā naguxchigagŭ. Rŭ  
nŭgŭgu naxŭnŭēgu rŭ togŭarŭ yexera nixŭgŭ, rŭ  
nŭgŭ nicuēxŭŭgŭ. Rŭ naxcēx nadaugŭ na yexera  
chixexŭ naxŭgŭxŭ. Rŭ tama nanatŭga rŭ naēga  
naxŭnŭēchaŭ.

31 Rŭ tama inarŭxŭnŭēchaŭ. Rŭ tama aixcŭma  
nayanguxēē i ngēma nŭxŭ yaxugŭxŭ. Rŭ  
taxŭexŭma nangechaŭgŭ. Rŭ tama togŭaxŭ nŭxŭ  
nangechaŭ i ṭacŭ rŭ guxchaxŭ. Rŭ tama ṭoguāx

nūxŭ tangechaŭtŭmŭŭgŭ.

<sup>32</sup> Rŭ nŭmagŭ i ngēma duŭxŭgŭ rŭ meāma nūxŭ nacuèxgŭchirēx rŭ Tupana rŭ marŭ namaā nanaxuegu na noxtacŭma nayuexŭ i ngēma duŭxŭgŭ i ngēmaācŭ maxēxŭ. Natŭrŭ woo meāma nūxŭ nacuèxgŭchirēx i guxŭma i ngēma, natŭrŭ nanaxŭgŭama i ngēma chixexŭ, rŭ nataāēgŭ ega togŭ naxŭxgu.

## 2

*Ngēxguma Tupana duŭxŭgŭxŭ poxcugu, rŭ tama chixexŭ naxŭ, erŭ ngēma duŭxŭgŭ rŭ norŭ chixexŭgagutama nanapoxcue*

<sup>1</sup> Rŭ ngēmacèx, Pa Duŭxŭx, rŭ woo texé quixŭgu rŭ taxuacŭma Tupanapēxewa cugŭétŭwa cuchogŭ, ega togŭxŭ quixuechagu. Erŭ ngēxguma togŭxŭ quixuechagu na nachixexŭ rŭ cugŭtama cupoxcu, erŭ cuma na cumŭcŭxŭ quixuechaxŭ rŭ cuma rŭ ta cunaxŭ i ngēma chixexŭ i cumŭcŭxŭ naxcèx quixuechaxŭ.

<sup>2</sup> Rŭ nūxŭ tacuèx rŭ Tupana tá nanapoxcue i ngēma duŭxŭgŭ i namŭcŭgŭxŭ ixugŭechaxŭ. Rŭ ngēxguma napoxcueāgu, rŭ tama chixexŭ naxŭ ya Tupana, erŭ ngēma duŭxŭgŭ rŭ norŭ chixexŭgagutama nixŭ i napoxcueāxŭ.

<sup>3</sup> Rŭ dŭcax, Pa Duŭxŭx, rŭ ngēxguma togŭxŭ quixu-echagu, natŭrŭ cuma rŭ ta cunaxŭxgu i ngēmatama chixexŭ i nŭma naxŭxŭ, ŷrŭ ñuxŭcŭrŭwa tá i nagu curŭxŭnŭxŭ na Tupanachaxwa iquicŭxŭ na tama cuxŭ napoxcuxŭcèx?

4 ¿Rü tüxcüŭ tama nagu curüxĩnü i ngẽma mexŭ i Tupana cuxcèx üxŭ? Nüma rü poraãcüxüchi cumaã namecüma rü yaxna cumaã naxĩnü rü tama paxa curü chixexüçèx cuxŭ napoxcuhaŭ. ¿Rü ñuxma rü tüxcüŭ nüxŭ cuxo? ¿Tama êxna nüxŭ cucuèx na Tupana ngẽmaãcü cumaã mecümaxŭ na nüxŭ curüxoxüçèx i curü chixexŭ rü naxcèx na cumaxüxüçèx ya Tupana?

5 Natürü cuma rü tama Tupanaxŭ cucuáxchaŭ rü tama nüxŭ curüxoxchaŭ i curü chixexŭ. Rü ngẽmaãcü cugüçèxtama cunayexeraxêẽ i curü poxcu i tá cuyaxuxŭ i ngẽma ngunexŭ i nagu Tupana napoxcuexŭ i ngẽma chixexŭ ügüxŭ. Rü ngẽma ngunexügu rü Tupana tá aixcüma ngẽma duüxügümaã nanaxuegu na ñuxãcü tá na napoxcueãxŭ.

6 Rü ngẽxguma tá nixĩ i Tupana nüxŭ yaxügütanüxŭ i wüxichigü i duüxŭ naxcèx i ngẽma naxügüxŭ.

7 Rü maxŭ i taguma gúxümaã Tupana tá tüxŭ nanaxütanü ya yíxema guxüguma mexŭ taxügüãcüma naxcèx daugüxe na Tupana tümamaã taãèxŭ rü naxcèx daugüxe na aixcüma Tupanaxütawa tangugüxŭ.

8 Natürü Tupana tá tümamaã nanu rü tá tüxŭ napoxcu ya yíxema tügüguxicatama rüxĩnüèxè rü tama naga ñnüèchaüxè i ore i aixcüma ixixŭ rü naxcèx daugüxe na ngẽma chixexŭ taxügüxŭ.

9 Rü guxüma i ngẽma duüxügü i chixexŭ ügüxŭ rü tá ngüxŭ ningegü rü poraãcü tá chixexŭ nüxŭ naxüpetü. Rü ngẽma Yudíugü i chixexŭ ügüxüĩra tá nixĩ i Tupana inapoxcuexŭ. Rü ngẽmawena rü tá nanapoxcue i guxüma i ngẽma togü i duüxügü i



chixexŭ ügŭxŭ.

<sup>10</sup> Natürü ngēma duŭxŭgŭ i mexŭ ügŭxŭ, rŭ Tupana tá namaã nataãe, rŭ tá nanatachigaxēe, rŭ tá nanataãexēe. Rŭ ngēma Yudíugŭ i mexŭ ügŭxŭcèxira tá nixĩ i ngēma. Rŭ ngēxgumarŭŭ i guxŭma i togŭ i duŭxŭgŭ i mexŭ ügŭxŭcèx rŭ tá ta nixĩ.

<sup>11</sup> Erŭ Tupanapēxewa rŭ nawüxigu i ngēma duŭxŭgŭ i Yudíugŭ ixíggŭxŭ rŭ ngēma togŭ i duŭxŭgŭ i tama Yudíugŭ ixíggŭxŭ. Rŭ guxāma ya texé ya chixexŭ ügŭxe rŭ tá tanayaxu i tŭmaārŭ poxcu, natürü guxāma ya texé ya mexŭ ügŭxe rŭ tá Tupana tŭmamaã nataãe.

<sup>12</sup> Rŭ guxŭma i duŭxŭgŭ i pecadu ügŭxŭ i tama nüxŭ cuèxgŭxŭ i ngēma mugŭ ga Moíché ũmatŭxŭ, rŭ tá inayarŭtauxe. Rŭ ngēxgumarŭŭ ta i guxŭma i ngēma pecaduāxgŭxŭ i nüxŭ cuèxgŭxŭ i ngēma mugŭ ga Moíché ũmatŭxŭ, rŭ ngēma mugŭ nüxŭ ixuxŭācŭma Tupana tá nanapoxcue.

<sup>13</sup> Erŭ Tupanapēxewa rŭ taxuwama name i ngēma duŭxŭgŭ i nüxŭ ĩnŭēmarexŭ natürŭ tama nagu maxēxŭ i norŭ mugŭ. Natürü ngēma duŭxŭgŭ i Tupanaārŭ mugŭga ĩnŭēxŭ nixĩ i aixcŭma Tupanapēxewa imexŭ.

<sup>14</sup> Dücèx, i ngēma duŭxŭgŭ i tama Yudíugŭ ixíggŭxŭ. Nŭmagŭ rŭ tama nüxŭ nacuèxgŭ i Tupanaārŭ mugŭ. Natürü ngēxguma nüēchamatama naxŭgŭmareāgu i ngēma Tupana tŭxŭ muxŭ, rŭ tŭxŭ nüxŭ nadauxēe na nüxŭ nacuèxgŭxŭ i ŭacŭ na yĩxŭ i mexŭ rŭ ŭacŭ na yĩxŭ i chixexŭ, woo tama nüxŭ na nacuèxgŭchiréxŭ i Tupanaārŭ mugŭ.

<sup>15</sup> Erŭ nacŭmagŭwatama nixĩ i tŭxŭ nüxŭ nadauxēēxŭ na nüxŭ nacuèxgŭxŭ na ŭacŭ yĩxŭ

i mexŭ rŭ ʦacŭ na yĩxŭ i chixexŭ. Rŭ ngēma duŭxŭgŭ rŭ ngēxguma chixexŭ naxŭgŭgu, rŭ naãēwatama nixĩ i nŭxŭ nacuèxgŭxŭ na nachixexŭ i ngēma naxŭgŭxŭ. Rŭ ngēxgumarŭ ta i ngēxguma mexŭ naxŭgŭgu, rŭ naãēwatama nixĩ i nŭxŭ nacuèxgŭxŭ na namexŭ i ngēma naxŭgŭxŭ.

<sup>16</sup> Rŭ ngēma ngunexŭ i nagu Tupana Cristuxŭ namuxŭ na guxŭ i duŭxŭgŭxŭ yacagŭxŭcèx i norŭ maxŭchiga, rŭ ngēma duŭxŭgŭ i tama Tupanaärŭ mugŭxŭ cuèxgŭxŭ rŭ naãēwa tátama nixĩ i nŭxŭ nacuèxgŭxŭ na chixexŭ naxŭgŭxŭ rŭ ēxna mexŭ naxŭgŭxŭ. Rŭ ngēxguma tá nixĩ i nangóxŭ i guxŭma i ngēma chixexŭ i cúácŭma naxŭgŭxŭ i duŭxŭgŭ, rŭ ngēma chixexŭ i nŭxĩcatama nagu naxĩnŭèxŭ. Rŭ Tupanaärŭ ore i pemaã nŭxŭ chixuxŭ nixĩ i tŭxŭ nŭxŭ cuèxēèxŭ i ngēma.

*Yudíugŭchiga rŭ mugŭ ga Moĩché ũmatŭxŭchiga*

<sup>17</sup> Natŭrŭ pema Pa Chaueneègŭ i Yudíugŭx, rŭ ñaperŭgŭgŭ:

“Toma rŭ Yudíugŭ tixĩgŭ rŭ meãma nŭxŭ tacuèx i Tupanaärŭ mugŭ ga Moĩché ũmatŭxŭ”, ñaperŭgŭgŭ. Rŭ ngēmaãcŭ nagu perŭxĩnŭè na Tupanapēxewa pimexŭ erŭ meãma nŭxŭ pecuèx i ngēma Tupanaärŭ mugŭ ga Moĩché ũmatŭxŭ. Rŭ ngēmaãcŭ Tupanamaã pegŭ picuèxŭgŭ erŭ nagu perŭxĩnŭè na Tupana pexŭ nangechaŭxŭ erŭ Yudíugŭ pixĩgŭ.

<sup>18</sup> Rŭ nŭxŭ pixu na meãma nŭxŭ pecuáxŭ i ʦacŭ nixĩ i Tupanaärŭ ngúchaŭ rŭ ʦacŭ nixĩ i mexŭ rŭ ʦacŭ nixĩ i chixexŭ. Rŭ Tupanaärŭ mugŭwa naxcèx pengúe na naxcèx pedauxŭ i ngēma aixcŭma mexŭ ixĩxŭ.

19 Rŭ pema rŭ ñaperŭgŭgŭ:

“Toma rŭ meãma nŭxŭ tacuèx na tanaxucuxèxŭ i ngèma togŭ i duŭxŭgŭ i tama Tupanaxŭ cuèxgŭxŭ. Rŭ meãma nŭxŭ tacuèx na itayanawèxãchixèèxŭ i ngèma togŭ i chixexŭwa ngèxmagŭxŭ”, ñaperŭgŭgŭ.

20 Rŭ pema nagu perŭxŭnŭègu rŭ nŭxŭ pecuèx na ñuxãcŭ penaxucuxèxŭ i ngèma togŭ i duŭxŭgŭ i tama Tupanaxŭ cuèxgŭxŭ rŭ ñuxãcŭ penangúexèèxŭ i ngèma duŭxŭgŭ i ngexwacèx yaxôgŭxŭ. Rŭ ngèmaãcŭ nagu perŭxŭnŭè na togŭarŭ ucuxèruŭgŭ pixŭgŭxŭ, erŭ Tupanaãrŭ mugŭwa pengúe rŭ ngèmacèx meãma nŭxŭ pecuèx i tacŭ nixŭ i mexŭ rŭ tacŭ nixŭ i ore i aixcŭma ixŭxŭ.

21 Rŭ dŭcax, Pa Chaueneègŭ i Yudŭgŭx, pema na togŭxŭ pengúexèèxŭ, ¿rŭ tŭxcŭŭ tama pegŭtama pengúexèè? Pema nŭxŭ pixu na tama namexŭ na ingŭxŭ, ¿rŭ tŭxcŭŭ i pema ipengŭèxŭ?

22 Rŭ pema nŭxŭ pixu na tama namexŭ na naŭ i ngemaã ipexŭ, ¿rŭ tŭxcŭŭ i pema i ngèmaãcŭ pemaxèxŭ? Rŭ pema na naxchi pexaiexŭ i togŭarŭ tupanagŭnetachicŭnèxãgŭ, ¿rŭ tŭxcŭŭ i naxcèx pengŭèxŭ i norŭ tupaucagŭarŭ ngèmaxŭgŭ?

23 Pema nŭxŭ pixu na namexŭ i Tupanaãrŭ mugŭ i ŭmatŭxŭ, rŭ petaãè erŭ meã nŭxŭ pecuèxgŭ i ngèma mugŭ. Natŭrŭ Tupanamaã chixexŭ pexŭe, erŭ tama naga pexŭnŭè i ngèma pexŭ namuxŭ i norŭ mugŭwa.

24 Rŭ ngèmacèx i Tupanaãrŭ ore i ŭmatŭxŭŭwa rŭ ñanagŭrŭ:

“Rŭ pegagu nixŭ na chixri Tupanachiga yadex-agŭxŭ i ngèma duŭxŭgŭ i tama Yudŭgŭ ixŭgŭxŭ”,

ñanagürü.

<sup>25</sup> Pema rü pegü ípewiechèxmüþëxechiraũgü na Tupanaãrü duũxũgü pixĩgüxũcèx. Rü name nixĩ na penaxũxũ i ngẽma, ega aixcũma naga pexĩnũëgu i Tupanaãrü mugü. Natürü ngëxguma chi tama naga pexĩnũëgu i Tupanaãrü mugü, rü woo Yudíugü pixĩgügu, natürü Tupanapëxewa rü taxuwama pexũ name i ngẽma na pegü ípewiechèxmüþëxechiraũgüxũ.

<sup>26</sup> Rü ngẽma togü i duũxũgü i tama nügü íwiechèxmüþëxechiraũgüxũ, rü woo tama ngẽma naxügügu, natürü Tupanaãrü duũxũgü tá nixĩgü ega naga naxĩnũëgu i norü mugü.

<sup>27</sup> Rü dücax, Pa Chaueneëgü i Yudíugüx, rü ngẽma duũxũgü i tama íwiechèxmüþëxechiraũgüxũ natürü naga ñnũëxũ i Tupanaãrü mugü, rü ngẽma duũxũ rü tá Tupana-pëxewa pexũ nixu na ñuxãcü pechixexũ. Rü ngẽmaãcü tá pexũ naxüpetü erü tama naga pexĩnũë i Tupanaãrü mugü i wochirëx na nũxũ pecuáxũ i ngẽma mugü, rü wochirëx na ípewiechèxmüþëxechiraũgüxũ.

<sup>28</sup> Rü dücax, rü tama ngẽma na Yudíuxacügü pixĩgüxũcèx nixĩ na aixcũma Tupanaxãcügu pixĩgüxũ. Rü tama ngẽma na ípewiechèxmüþëxechiraũgüxũcèx nixĩ na Tupanaãrü duũxũgü pixĩgüxũ.

<sup>29</sup> Erü yíxema aixcũma tümaãrü maxũnewa Tupanaga ñnũxẽ tixĩ ya aixcũma Tupanaxãcü ixĩxẽ. Rü ngëxguma aixcũma taãëwa yaxõxgu nixĩ i aixcũma Tupanaãrü ixĩxũ. Rü Tupanaãë i Üünexũ nixĩ i tüxũ rüngüxẽëxũ na yaxõxũcèx, rü tama ngẽma mugü ga Moĩché ümatüxũgagu nixĩ. Rü

yíxema aixcūma Tupanaārū ixīxē, rū Tupana rū tūmamaã nataã wo duūxūgū tama tūmamaã taãēgūgu.

### 3

<sup>1</sup> ¿Rū ñuxma rū tacūwa tūxū namexū na Yudíugū ixīgūxū? ¿Rū tacūwa namexū na íiwiechēmüpēxechiraūgūxū?

<sup>2</sup> Rū poraācūxūchima tūxū name na Yudíugū ixīgūxū. Yerū nūma ga Tupana rū tūxnaxūchi nixī ga naxāxū ga norū mugū i ūmatūxū.

<sup>3</sup> ¿Rū tacū tá ngupetūxū i ñuxma ega ñuxre i tatanūxū i Yudíugū rū tama meā yanguxēēgūāgu i ngēma Tupana tūxū muxū? ¿Rū pexcēx rū ngēmacēx tāūtāma yanguxēēāxū ya Tupana i ngēma tamaā inaxunetaxū?

<sup>4</sup> Rū tama ngēmaācū nixī. Erū woo guxū i duūxūgū rū yadoratēēxgūgu, natūrū Tupana rū taguma nidora rū guxūguma nayanguxēē i ngēma nūma tamaā inaxunetaxū. Rū yemacēx norū ore ga Dabí ūmatūxūwa rū ñanagūrū:

“Cumax, Pa Tupanax, rū aixcūma nixī i curū ore i nūxū quixuxū. Rū ngēxguma cuxū tangugūgūgu rū nūxū tadaugū na aixcūma cumexū”, ñanagūrū.

<sup>5</sup> Natūrū duūxūgū rū ínatūe erū ñanagūrūgū:

“Rū nūetama nixī na chixexū ixīgūxū erū ngēmaācū yexeraācū nangox na namecūmaxū ya Tupana”, ñanagūrūgū. Rū ñanagūrūgū ta:

“Rū ngēxguma chi tórū chixexūgagu yexeraācū nangoxgu na aixcūma namecūmaxū ya Tupana,

rü maneca tama name ega tórü chixexücèx tüxü napoxcuegu”, ñanagürügü.

<sup>6</sup> Natürü ngēma ñaxügu na naxĩnüèxü i duüxügü rü poraãcü ínatüe, erü tama ngēmaãcü nixĩ. Erü ngēxguma chi tama namexgu ya Tupana, ¿rü ñuxãcü chi i meã duüxügüxü yacagüxü i naãneãrü guxgu?

<sup>7</sup> Natürü i duüxügü rü ñanagürügü:

“Rü ngēxguma chi chorü chixexügagu yexeraãcü nangoxgu na ñuxãcü aixcüma namexü ya Tupana, ¿rü tüxcüü yĩxü i choxna naçaxü naxcèx i chorü chixexü rü choxü napoxcuxü naxcèx i ngēma?” ñanagürügü.

<sup>8</sup> Natürü ngēma ñaxügu na naxĩnüèxü i duüxügü rü poraãcü ínatüe. Erü ngēxguma chi aixcüma yixĩgu i ngēma nagu naxĩnüèxü i duüxügü, rü chi narümemaë nixĩ na yexeraãcü chixexü naxügüxü na yexeraãcü mexü na ínguxuchixücèx. Rü dücax, Pa Chaueneëgüx, nangēxma i chixexü i duüxügü i choxü ügagümarexü i nüxü ixugüexü na ngēma yĩxü i chorü nguxëëtae i duüxügüxü namaã changüexëèxü. Natürü ngēma duüxügü i ngēma ñagüxü rü nagatu tátama napoxcue.

### *Guxãma i yixema rü taxüetüxügü*

<sup>9</sup> ¿Rü ñuxãcü nixĩ i ñuxmax? ¿Pexcèx rü yixema i Yudíugü rü togü i duüxügüarü yexera Tupanapëxewa imexü? Pemaã nüxü chixu rü tama ngēmaãcü nixĩ. Erü guxüma i duüxügü i Yudíugü ixígüxü rü guxüma i duüxügü i tama Yudíugü ixígüxü, rü naxüetüxügü.

<sup>10</sup> Erü Tupanaãrü ore i ümatüxüwa rü ñanagürü:

“Rü tataxuma ya texé ya aixcüma Tupanapëxewa mexë, rü bai ya wüxie.

11 Rü tataxuma ya texé ya aixcüma nüxŭ cuáxe i Tupanaärü ore na ñuxäcü nanaxwëxexŭ na naxcèx imaxëxŭ. Rü tataxuma ya texé ya aixcüma Tupanacèx dauxe.

12 Rü guxãma ítatüe, rü guxãma itayarütauxe rü chixexŭ taxügü i Tupanapëxewa. Rü tataxuma ya texé ya aixcüma mexŭ üechaxe, rü bai ya wüxie.

13 Rü tümaãx rü wüxi i yuetamaxŭ i ingenaxŭrüü nixĩ erü ngëma ítanaxŭxŭxëë i nagúxŭraŭxŭ i dexa i chixexŭ. Rü tümaärü conümaã rü poraäcü tidorae. Rü ngëma tümaärü dexa rü ñoma äxtapeguchatarüü nixĩ erü togüxŭ nachixexëë.

14 Rü chixexŭ i ore i duŭxŭgüãëwa ngúxŭmaãxĩcatama tidexagü.

15 Rü ítamemare na duŭxëxŭ timáxŭ.

16 Rü ngextá ítaxŭwa rü togüxŭ tachixexëë rü tanangechaŭxëë rü chixexŭgu tanayixëë.

17 Rü tama nüxŭ tacuèx na ñuxäcü togü i duŭxŭgüxŭ tangechaŭgüxŭ rü meã natanüwa tamaxëxŭ.

18 Rü tama nüxŭ tacuáxchaŭ na Tupanaxŭ tamuŭëxŭ”, ñanagŭrü i ngëma ore i ümatüxŭwa.

19 Rü nüxŭ tacuèx rü ngëma poxcu i Tupanaarü mugüwa nüxŭ yaxuxŭ rü naxcèx nixĩ i ngëma Yudíugü ga natanüwa nanguxŭ ga yema mugü. Rü woo ngëma tama Yudíugü ixíguxŭ i duŭxŭgücèx rü ta nixĩ i ngëma poxcu. Erü taxúema aixcüma naga taxĩnü i ngëma mugü. Rü ngëmacèx taxucŭrüwa texé Tupanapewa tügü ítapoxŭ i ngëxguma Tupana tüxŭ icagügu i tümaärü pecaduchiga.

20 Rŭ ñuxma na taxúema aixcúma naga ñnũxũ i ngẽma mugũ, rŭ ngẽmacèx taxucürŭwama texé tŭgũ tixu na ngẽma mugũ taxaurexũgagu Tupanapẽxewa tamexũ. Erũ ngẽma mugũ tũxũ nüxũ cuèxẽxũ nixĩ na poraãcü ipecaduãxgũxũ.

*Tórũ õgagu nixĩ i Tupana tũxna naxãxũ i maxũ*

21-22 Rŭ ñuxma na taxucürŭwama Tupanapẽxewa tũxũ yamexẽxũ i ngẽma mugũ, rŭ ngẽmacèx ya Tupana rŭ tũxũ nüxũ nacuèxẽ na ñuxãcü yĩxũ i tũxũ yamexẽxũ na napẽxewa imexũcèx. Rŭ pemaã nüxũ chixu rŭ Ngechuchu ya Cristuaxũ na yaxõgũxũgagu nixĩ i tũxũ yamexẽxũ ya Tupana na aixcúma napẽxewa imexũcèx. Rŭ yema mugũ ga Moĩché ũmatũxũ rŭ yema ore ga nuxcúmaũgũxũ ga orearũ uruũgũ ũmatũxũ rŭ tũxũ nüxũ nacuèxẽ i ngẽma. Rŭ yema mexũ ga Tupana taxcèx ũxũ ga yexguma núma namuãgu ga Nane na tórũ pecadu naxũtanũxũcèx, rŭ guxũ i duũxũgũ i yaxõgũxũcèx nixĩ, erũ Tupanapẽxewa rŭ nawüxigu i guxũma i ngẽma duũxũgũ.

23 Rŭ guxãma tipecaduãxgũ rŭ nüxna tayaxũgugũ ya Tupana ya tũxũ maxẽxẽcü.

24 Natürũ ga Tupana rŭ poraãcü tamaã namecúma rŭ yemacèx tũxũ nangetanũãcúma tũxũ nimexẽgũ na napẽxewa imexũcèx. Rŭ ñuxma rŭ tũxũ nangẽxma i maxũ i taguma gũxũ, yerũ Ngechuchu ya Cristu rŭ marũ tũxũ nanaxũtanũ ga tórũ pecadugũ.

25-26 Rŭ Tupana rŭ aixcúma núma nanamu ga Cristu na nayuxũcèx rŭ yemaãcü tórũ pecadu naxũtanũxũcèx na Tupana tũxũ nüxũ rŭngũmaxũcèx i ngẽxguma aixcúma Cristuaxũ



yaxōgūgu. Rū yemaācū nanaxū ga Tupana na tūxū nūxū nadauxēēxūcèx na ñuxācū nūma nūgūcèx tūxū yamexēēxū na aixcūma napēxewa imexūcèx. Rū nuxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū ñuxma rū ta tūxū nanawēx na ñuxācū aixcūma namexū i ngēma nūma naxūxū erū tūxū ínanapi i tórū pecadugū. Rū ngēmaācū tūxū nūxū nadauxēē na ñuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe.

27 Rū ngēmacèx i ñuxma rū taxucürūwama yigū ticuèxūgū rū nūxū tixu na yixematama yigū imexēēgūxū i napēxewa. Erū taxucürūwama texé tūgū tamexēē i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natürū Tupanapēxewa time i ñuxma, erū Cristuaxū tayaxōgū.

28 Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū tama ngēma mugū na ixauregūxūcèx nixī i napēxewa imexū.

29 ¿Éxna pexcèx rū Tupana rū Yudíugüarū Tupanaxīcatama yīxū? ¿Rū tama éxna i ngēma togū i duūxūgüarū Tupana rū ta yīxū? Ngēmaācūx, ngēma togū i duūxūgū i tama Yudíugū ixīgūxūārū Tupana ta nixī.

30 Rū nūxū tacuèxgū na nangēxmaxū ya wūxitama ya Tanatū ya Tupana. Rū guxūma i duūxūgū i Cristuaxū yaxōgūxū, rū nūma ya

Tupana rü nayamexēē na napēxewa yamexūcèx. Rū ngēmaācū i nūma ya Tupana rü Yudiugūxū nimexēē i ngēxguma yaxōgūāgu. Rū ngēxgumarūū ta nayamexēē i guxūma i togū i duūxūgū i ngēxguma Cristuaxū yaxōgūāgu.

<sup>31</sup> Rū ñuxma na Cristuaxū yaxōgūxū, rü bexmana nagu perūxīnūē na ngēmaācū iyanaxoxēēxū i ngēma mugū. Natürü tama ngēmaācū nixī. Erü ñuxma na Cristuaxū yaxōgūxū rü aixcūma tayan-guxēē i ngēma Tupana tūxū muxū.

## 4

*Abráū rü Tupanaāxū nayaxō rü yemacèx Tupana nūxū nixu na namexū*

<sup>1</sup> ¿Rü ñuxma rü ñuxū ñagūxū tá i nachiga ga nuxcūmaūcū ga tórū oxī ga Abráū? ¿Rü ñuxācū nixī ga nūxū naxūpetūxū ga Tupanapēxewa? ¿Rü tūxcūū yīxū ga Tupana nūxū ixuxū ga Abráū rü mecū na yīxū?

<sup>2-3</sup> Rū dūcax, yexguma chi wūxi ga norū puracū ga mexūcèx Tupanapēxewa namexgu ga Abráū, rü yexguma chi waxī nixī ga nūxū nayexmaxū ga tacūcèx nūgū na yacuèxūūxū. Natürü taxucèxma Tupanapēxewa nūgū nicuèxūū ga Abráū, erü Tupanaārū ore i ūmatūxūwa rü ñanagürü:

“Abráū rü Tupanaāxū nayaxō, rü yemacèx Tupana nanayaxu rü nūxū nixu na namexū”, ñanagürü i ngēma ore.

<sup>4</sup> Rū ngēxguma texé wūxi i puracū ūxgu rü tūxū naxūtanūgu rü woetama tūmaārū natanū nixī rü tama āmare nixī i ngēma.

5 Natürü tama ngēmaācū nixī i ngēxguma Tupanaāxū yaxōxgu. Erü ngēxguma yaxōxgu, rü tama tacü rü puracü i mexücèx nixī i Tupanapēxewa imexū, natürü Tupanapēxewa time erü tayaxō. Rü ngēmaācū Tupana tüxū nayaxu ya yixema yaxōxē woo taxuūma i tacü rü puracü i mexū taxūxgu na ngēmacèx Tupana tüxū rüngūxēxū.

6 Rü nuxcūmaūcū ga āēxgacū ga Dabí rü ta tümachiga nidexa ga guxema duūxē ga yaxōxē. Rü nüxū nixu ga na tataāēxū ga guxema duūxē yerü Tupanapēxewa tame, woo tama tacü rü mexū taxūxgu na yemaācū Tupanapēxewa tamexücèx.

7 Rü nūma ga Dabí rü ñanagürü:

“Rü tataāēgü ya yixema duūxēgü ya Tupana tümaārü chixexūgūxū ngechaūxē rü tümaārü pecadugūxū iyanangūmaxē.

8 Rü tataāē ya yixema duūxē ya Tupana tama tüxū nagu naxīnūxē i tümaārü pecadu”,  
ñanagürü ga Dabí.

9 Rü dücax, ¿pexcèx rü ngēma taāē rü ngēma duūxūgü i Yudíugü ixīgūxücèxicatama yīxū, rü ēxna ngēma togü i duūxūgücèx ta yīxū? Dücèx, rü marü pemaā nüxū tixu rü Tupanapēxewa name ga Abráū yerü nayaxō. Rü yemacèx Tupana nanayaxu.

10 ¿Natürü ñuxgu nixī ga nayauxāxū? ¿Éxna marü ínawiechèxmüpēxechiraūguwena, rü ēxna naxūpa ga na ínawiechèxmüpēxechiraūxū? Rü pemaā nüxū chixu rü naxūpa nixī ga na Tupana nayaxuxū ga Abráū.

11 Rü Tupana nayaxuxguwena nixī ga

ínawiechèxmüpẽxechiraũxũ ga Abráũ. Rũ yema nixĩ ga norũ cuèxruũ ga nawa nüxũ nacuáxũ na aixcüma Tupana marũ nayaxuxũ rũ nüxũ nadauxũ na namexũ yerũ nüxũ nayaxõ. Rũ ngẽmacèx i ñuxma ya Abráũ rũ tümanatũ yĩxũ ya guxãma ya yixema yaxõgũxe woo tama ítawiechèxmüpẽxechiraũgũgu. Rũ ngẽmaãcü ya Tupana rũ tüxũ nayaxu ya guxãma ya yixema yaxõgũxe, rũ tüxũ nadau na timexũ erũ tayaxõgũ. <sup>12</sup> Rũ ngẽxgumarũũ ta ya Abráũ rũ tümanatũ nixĩ ya guxãma ya yixema íwiechèxmüpẽxechiraũgũxe rũ Abráũrũũ yaxõgũxe. Natürũ tama ngẽma na tügũ ítawiechèxmüpẽxechiraũgũxũcèx nixĩ i tümanatũ yĩxũ. Natürũ tümanatũ nixĩ erũ tayaxõgũ yexgumarũũ ga na yaxõõxũ ga nüma ga tanatũ ga Abráũ naxũpa ga na ínawiechèxmüpẽxechiraũxũ.

*Abráũ rũ Tupanaãxũ nayaxõ rũ yemacèx Tupana nayanguxẽẽ ga norũ uneta ga Abráũmaã nüxũ yaxuxũ*

<sup>13</sup> Rũ Tupana rũ Abráũmaã inaxuneta na nüma ya Abráũ rũ guxũma i naxrũũ yaxõgũxũ rũ tá na nayauxgũãxũ i ñoma i naãne na noxrũ yĩxũcèx. Natürũ tama yema na mugũ naxaurexũcèx nixĩ ga Tupana yemaãcü Abráũmaã ixunetaxũ. Natürũ yemaãcü namaã inaxuneta yerũ Abráũ nayaxõ, rũ yemacèx Tupanapèxewa name.

<sup>14</sup> Natürũ ngẽxguma chi ngẽma duũxũgũ i mugũ auregũxũcèxicatama yixĩgu i ngẽma Tupanaãrũ uneta, rũ natüçèxmamare chi nixĩ i ngẽma na yaxõgũxũ, rũ chi ngẽma Tupanaãrũ uneta rũ taxuwama name.

15 Nūxŭ tacuèx rŭ ngēma mugŭ ga Moĩché ũmatŭxŭ rŭ poxcuwa tŭxŭ naga erŭ taxúema aixcŭma meã tayanguxēē. Natŭrŭ yexguma chi natauxguma ga yema mugŭ rŭ tataxu chima na texé chixri yanguxēēxŭ.

16 Rŭ yexguma Tupana Abráŭmaã ixunetagu na nŭxŭ tá nangŭxēēxŭ, rŭ Abráŭrŭ ōgagu nixĩ ga namaã inaxunetaxŭ. Rŭ ngēmacèx i guxāma i yixema na Abráŭrŭŭ yaxōgŭxŭ rŭ taxcèx ta nixĩ ga yema Tupanaārŭ uneta ga Abráŭmaã nŭxŭ yaxuxŭ. Rŭ ngēmawa nŭxŭ tacuèx rŭ tama yixema mugŭ aurgŭxecèxicatama nixĩ i ngēma Tupanaārŭ uneta, natŭrŭ guxāma ya yixema Abráŭrŭŭ Tupanaāxŭ yaxōgŭxecèx ta nixĩ. Rŭ ñuxma rŭ guxāma i yixema na Abráŭrŭŭ meã yaxōgŭxŭ rŭ Abráŭxācŭgŭ tixĩgŭ rŭ nŭma rŭ tanatŭ nixĩ i Tupanapèxewa yerŭ nŭxĩra nayaxō.

17 Rŭ Tupanaārŭ ore i ũmatŭxŭwa rŭ Abráŭchigaxŭ nixu rŭ ñanagŭrŭ:

“Rŭ muxŭma i duŭxŭgŭnatŭ tá cuxŭ chixĩxēē”, ñanagŭrŭ. Rŭ Abráŭ rŭ Tupanaāxŭ nayaxō, rŭ yemacèx Tupana nayanguxēē ga norŭ uneta ga namaã nŭxŭ yaxuxŭ. Rŭ yima Tupana nixĩ ya wena namaxēxēēcŭ i yuexŭ. Rŭ yimatama nixĩ ya naxŭcŭ i ngēma woo ñuxma taxuxŭ.

18 Rŭ nŭma ga Abráŭ rŭ aixcŭma nayaxō ga yexguma Tupana nŭxŭ ñaxgu:

“Rŭ tá namuxŭchi i cutagŭ”,

ñaxgu. Rŭ woo ga Abráŭ ga marŭ yaguāxŭchichirèx na yĩxŭ rŭ na nangexacŭxŭ, natŭrŭ nayaxōōma ga yema Tupanaārŭ uneta rŭ meã ínananguxēē na wŭxi ga nane tá nŭxŭ yexmaxŭ. Rŭ yemaācŭ ningu na muxŭma i

duŭxŭgŭnatŭ yŭxŭ, yema Tupana namaã nŭxŭ ixuxŭrŭŭ.

<sup>19</sup> Rŭ Abráŭ rŭ wixguxuchi 100 ga taunecŭ nŭxŭ nayexma ga yexguma. Natŭrŭ tama inayarŭmaãchi ga na yaxŏŏxŭ woo nŭxŭ na nacuáxŭ ga paxa tá na nayuexŭ ga nŭma rŭ namèx ga Chara rŭ marŭ poraãcŭ nangupetŭarŭ taunecŭãxgŭxŭ ga na naxããcŭgŭxŭcèx.

<sup>20</sup> Rŭ yemaãcŭ ga Abráŭ rŭ nayaxŏŏma na nŭxŭ tá nayexmaxŭ ga wŭxi ga nane yema Tupana namaã ixunetaxŭrŭŭ. Rŭ tama nagu narŭxŭnŭ na Tupana ngŭrŭãchi nawomŭxèèxŭ. Natŭrŭ yexeraãcŭ Tupanaãxŭ nayaxŏŏma, rŭ nŭxŭ nicuèxŭŭ.

<sup>21</sup> Rŭ aixcŭmaxŭchi nayaxŏ na naporaxŭ ya Tupana na yanguxèèãxŭcèx i guxŭma i ngèma norŭ uneta.

<sup>22</sup> Rŭ yemacèx ga Tupana rŭ nŭxŭ nixu na napèxewa namexŭ ga Abráŭ. Yerŭ Tupana nŭxŭ nadau ga ñuxãcŭ aixcŭma nŭxŭ na yaxŏŏxŭ.

<sup>23</sup> Rŭ tama Abráŭchigaxicatama nixŭ ga naxŭmatŭxŭ ga Tupanaãrŭ ore ga ñaxŭ:

“Rŭ Tupana rŭ nŭxŭ nixu na napèxewa namexŭ ga Abráŭ, yerŭ nŭxŭ nadau ga ñuxãcŭ aixcŭma nŭxŭ na yaxŏŏxŭ”,

ñaxŭ.

<sup>24</sup> Natŭrŭ guxãma i yixema na yaxŏgŭxŭchiga ta nixŭ i ngèma ore. Erŭ Tupana rŭ tŏrŭ ŏgagu tŭxŭ nade na napèxewa imexŭ i yixema i nŭxŭ na yaxŏgŭxŭ ya yima yuwa tŏrŭ Cori ya Ngechuchuxŭ írŭdaxèècŭ.

<sup>25</sup> Rŭ Ngechuchuxŭ nixŭ ga namuxŭ ga Tupana na tŏrŭ pecaducèx nayuxŭcèx. Rŭ ñuxŭchi nŭma ga Tupana rŭ wenaxãrŭ Ngechuchuxŭ ínarŭdaxèè na

nagagu imexūcèx i Tupanapēxewa.

## 5

*Ñuxma rü Tupanapēxewa tame erü Cristuaxū tayaxōgü*

<sup>1</sup> Rū ñuxma rü Tupanapēxewa time erü tayaxōgü. Rū ngēmacèx marü tama Tupanamaã taxuwanüāxgü i ñuxmax, erü tórü Cori ya Ngechuchu ya Cristu rü marü tamaã nanangüxmüxēē ya Tupana.

<sup>2</sup> Rū Cristugagu nixī na tamaã namecūmaxū ya Tupana i ñuxmax erü tayaxōgü. Rū nüxū tacuèx rü guxūgutáma tamaã namecūma. Rū tataãēgü erü nüxū tacuèx na tüxū tá nangēxmaxū i tachica i mexū i Tupanaxūtawa.

<sup>3</sup> Rū ngēxgumarüü ta tataãēgü i woo ngúxū ingegügu. Erü nüxū tacuèx rü ngēma ngúxū rü tüxū narüngüxēē na yexeraācü iporaexū rü yaxna namaã ixīnūēxūcèx.

<sup>4</sup> Rū ngēxguma yaxna namaã ixīnūēgu rü Tupana rü tamaã nataãē. Rū ngēma na tamaã nataãēxū rü ngēmacèx meã ítananguxēē na tüxū tá nangēxmaxū i tachica i mexū i Tupanaxūtawa.

<sup>5</sup> Rū ñuxma na ínanguxēēxū na tüxū tá nangēxmaxū i tachica i Tupanaxūtawa, rü ngēmacèx taxucèxma tangechaūgü. Erü Tupana rü poraācü tüxū nangechaū. Rū ngēma Naãē i Üünexū i tüxna namuxū nixī i tüxū nüxū cuèxēēxū i ngēma.

<sup>6</sup> Rū yexguma taxucürüwama yigütama imaxēxēēgu, rü nawa nangu na Tupana yanguxēēxū ga yema norü uneta. Rū yexguma

nixĩ ga ñoma ga naãnewa namuãxũ ga Cristu na pecaduãxgũxũcèx nayuxũcèx.

<sup>7</sup> Rũ tama natauxcha na wüxie rü to i duũxũcèx tayuxũ, woo wüxi i duũxũ i mexũcèx yixĩgu. Rũ woo tangẽxmagu ya texé ya naxcèx yuchaũchiréxe i wüxi i duũxũ i aixcüma mexẽchixũ, natürü tama tüxũ natauxcha i ngẽma.

<sup>8</sup> Natürü Tupana tüxũ nüxũ nadauxẽẽ na ñuxãcü tüxũ nangechaũxũ yerü yexguma ipecaduãxgũgu nixĩ ga taxcèx nayuxũ ga Cristu.

<sup>9</sup> Rũ ñuxma rü Tupanapewa time yerü taxcèx nayu ga Cristu. Rũ ngẽmacèx meãma nüxũ tacuèx rü nüma rü aixcüma tá tüxũ ínanguxũxẽẽ na tama tüxũ napoxcuexũcèx ya Tupana.

<sup>10</sup> Rũ yexguma norü uwanügü ixĩgũgu, rü nümatama ga Tupana rü nügümaã tüxũ narüngüxmüẽxẽẽ ga yexguma nayuxgu ga Nane. Rũ ñuxma na marü namaã irüngüxmüẽxũ, rü yexeraãcü nüxũ tacuèx na tüxũ nangẽxmaxũ i maxũ i taguma gúxũ nagagu na namaxũxũ i nümax.

<sup>11</sup> Rũ tama ngẽxĩcatama nixĩ. Natürü i ñuxma rü tórü Cori ya Ngechuchu ya Cristugagu rü Tupana-maã tataãẽgü, yerü Cristugagu nixĩ ga Tupana ga tamaã nangüxmüxũ.

### *Adáũchiga rü Cristuchiga*

<sup>12</sup> Rũ nüxiraxũcü ga yatü ga Adáũgagu nixĩ ga guxũma ga duũxũgüwa nanguxũ ga pecadu. Rũ pecadugagu ínangu i yu. Rũ yemaãcü guxũma ga duũxũgüwa naxüe na nayuexũ, yerü guxũma nipecaduãx.



13 Rū naxūpa na Tupana Moīchéna naxāxū ga yema mugū ga naxūmatūxū, rū duūxūgū rū chixexū naxūgüecha, rū yemacèx nayue. Natürü yema mugū rū tauta nayexma ga yexguma, rū yemacèx taxucürüwa texé nüxū tixu ga yema duūxūgū ga na chixri naga naxīnūēxū ga yema mugū.

14 Rū yema duūxūgū ga Adáūwena buexū rū tama Adáūrūū nanangōx ga yema orix ga Tupana nüxna chuxuxū. Natürü chixexū naxūgū, rū yemacèx nayue. Rū yemaācü nixī ñuxmata Tupana Moīchéna naxā ga yema mugū ga naxūmatūxū. Rū Adáūwa inaxūgū na nayuxū ga duūxūgū, natürü Cristuwa inaxūgū na nayaxuxū i maxū i taguma gúxū.

15 Natürü yema chixexū ga Adáū üxū rū taxuacü nagu tanangu i ngēma āmare ga Tupana tūxna āxū, erü tama namaā nawūxigu. Rū aixcūma nixī ga wūxi ga yatüarü chixexūgagu na nayuxū i guxūma i duūxūgū. Natürü tama yemaācü tamaā nanaxü ga Tupana. Yerü nüma rū tūxū nange-tanūācüma núma nanamu ga Nane ya Ngechuchu ya Cristu na tórü pecaducèx nayuxūcèx. Rū yemaācü guma Cristugagu Tupana nanamaxēxē i muxūma i duūxūgū.

16 Rū yema pecadu ga Adáū üxū rū taxuacūma nagu tanangu ga yema āmare ga Tupana tūxna āxū. Yerü wūxitama ga Adáūārü pecadugagu, rū Tupana nüxū nixu rū tá nayu naxcèx ga yema. Natürü Ngechuchu ya Cristugagu rū Tupana nüxū nixu na napēxewa imexū rū nüxna ínguxūxū i guxūma i tórü pecadugū.

17 Rū guxūma i duūxūgū nayue yerü wūxitama ga yatü ga Adáū rū pecadu naxü. Natürü tama

yemaãcū tamaã nanaxü ga Tupana, yerü ga nüma rü poraãcū tamaã namecūma rü tüxŭ nange-tanüãcūma tüxŭ narüngŭxëẽ. Rü ngëmacèx i ñuxma rü guxŭma i ngëma duŭxŭgü i Tupana nüxŭ ixuxŭ na napëxewa yamexŭ, rü nümatama ya Tupana rü Nane ya Ngechuchu ya Cristu-gagu nanamaxëxëẽ na namaã wüxigu ãëxgacügü yixŭgüxcèx.

<sup>18</sup> Rü yema Adáũärü chixexŭ rü poxcuwa nana-gagü ga guxŭma ga duŭxŭgü. Natürü yema mexŭ ga Ngechuchu ya Cristu üxŭ rü pecaduwa ínananguxŭxëẽ i guxŭma i duŭxŭgü i yaxõgüxŭ, rü nüxna nanaxã i maxŭ i taguma gŭxŭ.

<sup>19</sup> Rü guma nüxŭraũcū ga yatü ga Adáũ rü tama Tupanaga naxŭnū. Rü yemaãcū wüxitama ga yatügagu rü muxŭma ga duŭxŭgü rü nipecaduãx. Natürü ínangu ga guma yatü ga Ngechuchu, rü meã Tupanaga naxŭnū. Rü gumagagu rü muxŭma i duŭxŭgü rü tá nime i Tupanapëxewa.

<sup>20</sup> Rü Tupana rü Moĩchéna nanaxã ga norü mugü na duŭxŭgüxŭ nüxŭ nacuèxëẽxŭcèx na ñuxãcū poraãcū pecadu naxŭgüxŭ. Natürü yexguma yex-eraãcū pecadu naxŭgügu ga duŭxŭgü, rü yex-eraãcū Tupanaãxŭ nangechaŭtümüügü.

<sup>21</sup> Rü ñuxma woo pecadugagu na iyuexŭ, natürü Tupanaãxŭ tangechaŭtümüügü i guxŭguma. Rü ngëmaãcū pecaduwa tüxŭ ínanguxŭxëẽ na napëxewa imexŭcèx rü tórü Cori ya Ngechuchu ya Cristugagu tüxŭ nangëxmaxŭcèx i maxŭ i taguma gŭxŭ.

*Ñuxma rü tama pecadu ixügüxcèx nixĩ i imaxëxũ, natürü Cristucèx nixĩ i imaxëxũ*

<sup>1</sup> Rü ñuxma na Tupanaãxũ ingechaütümüügüxũ, ¿rü ñuxãcü tá imaxëxũ i ñuxmax? ¿Rü pexcèx rü namexũ na pecadu ixügüechaxũ na yexeraãcü Tupanaãxũ ingechaütümüügüxcèx?

<sup>2</sup> Rü dücax, tama ngẽmaãcü nixĩ. Erü ñuxma pecaduchaxwa rü ñoma iyuxürüü tixĩgü, erü marü tama naga taxĩnüë. Rü ngẽmacèx tama name i yeücürü pecadu taxügüecha.

<sup>3</sup> ¿Tama êxna nüxũ pecuèx na tacücèx yĩxũ na íbaiũxũ? Rü ítabaiũ na ngẽmaãcü duũxügüxũ nawéxcèx na aixcüma Ngechuchu ya Cristu- arü duũxügü na ixĩgüxũ. Rü yexguma íbaiũgu, rü nüma nayuxürüü yexma nayu ga tacüma ga nuxcümaũxũ.

<sup>4</sup> Rü yexguma íbaiũgu, rü Cristu yuxürüü yexma nayu ga tacüma ga nuxcümaũxũ, rü Cristu itáxürüü inatèx ga yema tacüma ga nuxcümaũxũ. Rü yemaãcü naxüpetü na wena imaxëxcèx rü tüxũ nangëxmaxüxcèx i maxũ i ngexwacaxũxũ, yexgumarüü ga Ngechuchu na yuwa írüdaxũ rü wena namaxũxũ ga yexguma Nanatü ga Tupana norü poramaã ínadxëëgu.

<sup>5</sup> Rü ñuxma na Cristumaã wüxigu nayuxũ ga tacüma ga nuxcümaũxũ, rü nüxũ tacuèx na aixcüma Cristumaã tüxũ nangëxmaxũ i maxũ i ngexwacaxũxũ.

<sup>6</sup> Rü nüxũ tacuèx rü yema tórü maxũ ga nuxcümaũxũ rü Cristumaã wüxigu curuchagu nayu na yexma yanaxoxüxcèx ga yema tacüma ga chixexũ. Rü ñuxma rü tama pecadutüüwa tangëxmagü, rü ngẽmacèx marü tama naga

taxĩnũẽ.

<sup>7</sup> Erũ yĩxema yĩxe rũ marũ tama pecadutũũwa tangẽxma na yeũcũrũ pecadu taxũechaxũcèx.

<sup>8</sup> Rũ ñuxma na Cristumaã nayuxũ ga tórũ maxũ ga nuxcũmaũxũ, rũ nũxũ tacuèx na Cristurũũ tũxũ nangẽxmaxũ i maxũ i ngexwacaxũxũ.

<sup>9</sup> Rũ nũxũ tacuèx rũ ñuxma na yuwa ínadaxũ ya Cristu, rũ tagutáma wena nayu. Yerũ nũma rũ marũ yuxũ narũyexera.

<sup>10</sup> Rũ yexguma nayuxgu ga Cristu rũ pecaducèx nixĩ ga nayuxũ, rũ noxtacũma yexma wũxicana ningutanũ ga guxũma ga duũxũgũarũ pecadugũ. Natũrũ ñuxma na namaxũxũ, rũ Tupanacèx nixĩ i namaxũxũ na Tupanaãrũ ngũchaũ naxũxũcèx.

<sup>11</sup> Rũ ngẽxgumarũũ ta i pema rũ name nixĩ i pegũgu perũxĩnũẽ na marũ peyuexũ pecaduchaxwa rũ Tupanacèx pemaxẽxũ, erũ Ngechuchu ya Cristuarũ duũxũgũ pixĩgũ.

<sup>12</sup> Rũ ngẽmacèx rũ tama name i pecadutũũwa pegũ pengẽxmagũxẽẽ na pemaã inacuáxũcèx. Rũ tama name i penaxũchica i pecadu na pexeneãrũ ngũchaũgũ i chixexũ pexũ naxũxẽẽxũcèx.

<sup>13</sup> Rũ tama name i pecaduna penaxãgũ i pexene na ngẽmamaã chixexũ pexũgũxũcèx. Rũ name nixĩ i Tupanana pegũ pexãgũ, erũ ñoma duũxũgũ i yuexũ rũ wena maxẽxũrũũ pixĩgũ. Rũ ngẽmacèx name nixĩ i Tupanana penaxãgũ i pexene na ngẽmamaã mexũ pexũgũxũcèx.

<sup>14</sup> Rũ ñuxma rũ tãũtáma pecadutũũwa pengẽxmagũ na pemaã inacuáxũcèx. Rũ yexguma yema mugũ ga Moĩché ũmatũxũwe perũxĩngu, rũ pemaã inacuèx ga pecadu. Natũrũ i ñuxma rũ Cristugagu Tupana pemaã namecũma, rũ nũma

nixĩ i pemaã inacuáxŭ i ñuxmax.

*Ngëxguma wüxi i corimëxëwa yigü ingëxmagüxëëgu, rü ngëmaga nixĩ i ixĩnüëxŭ*

<sup>15</sup> Rŭ ñuxma na tama yema Moĩché ũmatüxŭ ga mugütüŭwa ingëxmagüxŭ, rŭ ñuxma na Tupana rŭ Cristugagu tamaã mecümaxŭ, ¿rŭ ñuxãcü tá imaxëxŭ? ¿Rŭ pexcëx namexŭ na yeüürü pecadu ixügüechaxŭ? Rŭ dücax, tama name na ngëmaãcü imaxëxŭ.

<sup>16</sup> Rŭ pema nüxŭ pecuëx rŭ ngëxguma wüxi i corimëxëwa pegü pengëxmagüxëëgu na naga pexĩnüëxüçëx rŭ ngëma tá nixĩ i perü cori ixĩxŭ, rŭ pema rŭ norü duüxügü tá pixĩgü i ngëma cori i naga pexĩnüëxŭ. Rŭ ñuxma rŭ pema tá nüxŭ pedaugü ngoxi ngëxürüxŭ perü me yixĩ na ngëmaga pexĩnüëxüçëx. Rŭ ngëxguma pecadu i yuwa tüxŭ gagüxŭ perü me yixĩgu, rŭ ngëma tá nixĩ i pemaã icuáxŭ. Rŭ ngëxguma perü me yixĩgu na Tupanaga na pexĩnüëxŭ, rŭ yimaga tá pexĩnüë na napëxewa pimexüçëx.

<sup>17</sup> Natürü Tupanana moxë chaxã, yerü woo pecaduga na pexĩnüëchirëxŭ, natürü i ñuxma rŭ aixcüma naga pexĩnüë i ngëma nguxëëtae i marü peyaxuxŭ i Cristuchiga.

<sup>18</sup> Rŭ ñuxma rŭ Tupanaärü duüxügü pixĩgü erü nüma rŭ chixexüna pexŭ ínanguxüxëë na tama pecadu pexügüechaxüçëx. Rŭ ngëmaãcü pexŭ narüngüxëë na napëxewa pimexüçëx rŭ meã naxcëx pemaxëxüçëx.

<sup>19</sup> Rŭ ñoma i nañecüãx i duüxügümaã chidexarüŭ nixĩ i tauxchaxŭ i oremaã pemaã chidexaxŭ i ñuxmax, erü pema rŭ woetama

taguma nüxŭ pexĩnüē i ñaã ore, rü ngürüãchi tãütáma nüxŭ pecuèx i tacüchiga na yĩixŭ i ngēma pemaã nüxŭ chixuxŭ. Rŭ dücax, rŭ nuxcŭma rŭ ipenaxã ga pexene na namaã penaxügŭxŭcèx ga nagúxŭraŭxŭ ga chixexŭ. Natürü i ñuxma rŭ name nixĩ i Tupanana pegü pexã na aixcŭma napèxewa pexüünegŭxŭcèx rŭ naxcèxicatama pemaxèxŭcèx.

<sup>20</sup> Rŭ yexguma pecadutüŭwa peyexmagügu, rŭ taxucürŭwama Tupanapèxewa mexŭ pexügü ga yexguma.

<sup>21</sup> ¿Natürü tacüwa pexŭ namexŭ ga yema chixexŭ i ñuxma rŭ wüxi i ãne pexna ãxŭ? Yerü yema chixexŭ rŭ yuwamare pexŭ nagagü, rŭ tama i maxŭwa.

<sup>22</sup> Natürü marü tama pecadutüŭwa pengèxmagü i ñuxmax, erü marü nüxna ípenguŭ rŭ marü Tupanaärü duŭxŭgü pixigü. Rŭ ngēma waxi nixĩ i poraãcü pexŭ mexŭ erü ngēmagagu penayaxu i maxŭ i Tupanapèxewa üünexŭ rŭ ngēmawena tá penayaxu i maxŭ i taguma gúxŭ.

<sup>23</sup> Rŭ ngēma natanü na pecadu ixüxŭ, rŭ yu nixĩ. Natürü yíxema tórü Cori ya Ngechuchuaxŭ yaxôgüxe, rŭ Tupana tüxna nanaxãmare i maxŭ i taguma gúxŭ.

## 7

*Wüxi i ngecü rŭ ngèxguma nayutegu rŭ marü tama ngitemèxèwa ingèxma. Rŭ ñuxma na taxcèx nayuxŭ ya Cristu, rŭ marü tama yema Moïché ümatüxŭ ga mugütüŭwa tangèxmagü*

<sup>1</sup> Pa Chaueneëgüx, rŭ pema na nagu pexĩxŭ i ngēma mugü, rŭ nüxŭ pecuèx rŭ ngèxguma

tamaŭxguxicatama nixĩ na ngẽma mugütüüwa tangẽxmaxũ ya wüxichigü ya duũxẽ.

<sup>2</sup> Rũ dücax, rü wüxi i ngecü i âtecü rü ngĩtemẽxẽwa ingẽxma ega namaxyane ya ngĩte, erü ngẽma ñanagürü i ore i mugü. Natürü ngẽxguma nayuxgu ya ngĩte, rü marü tama ngĩtemẽxẽwa ingẽxma. Rũ yema mugü ga ngĩtemẽxẽwa ngĩxũ yexmaxẽẽxũ ga noxri rü marü tama ngĩmaã inacuèx.

<sup>3</sup> Rũ ngẽmaãcü i ngẽxguma namaxyane ya ngĩte rü to i yatümaã inapexgu, rü pecadu ixü. Natürü ngẽxguma marü nayuxgu ya ngĩte, rü marü nüxna ínguxuchi i ngẽma mugü ga ngĩtemẽxẽwa ngĩxũ yexmaxẽẽxũ ga noxrix. Rũ ngẽxguma wenaxärü naxãtegu rü taxuũma i chixexũ ixü.

<sup>4</sup> Rũ ngẽxgumarüũ ta i pemax, Pa Chaueneẽgüx, rü marü tama yema Moĩché ümatüxũ ga mugütüüwa pengẽxmagü yerü nüma ga Cristu rü pexcèx nayu. Rũ ngẽmacèx i ñuxma rü Cristu ga yuwa írüdacüarü pixígü. Rũ ngẽmaãcü nanaxü ya Tupana na naxcèx imaxèxüçèx, rü norü ngúchaũ ixügüxüçèx.

<sup>5</sup> Rũ yexguma nuxcümaũxũ ga tacümwawe rüxĩxgu rü poraãcü tanaxü ga taxüneärü ngúchaũgü woo yema mugü tüxna na nachuxuxũ ga yema. Natürü yexguma nüxü icuèxgu na nachuxuxũ ga yema pecadu ga ixüxũ, rü yexeraãcü tanaxüxchaũ. Rũ yemaãcü ga yema tórü pecadugü rü yuwa tüxũ nagagü.

<sup>6</sup> Natürü i ñuxma rü marü tama ngẽma mugütüüwa tangẽxmagü, erü Tupana rü marü nüxna tüxü ínanguxüxẽẽ. Rũ ngẽmacèx i ñuxma rü ñoma duũxũgü i iyuxürüũ tixígü i napèxewa

i ngēma mugū, erū marū tama tamaã inacuèx. Rū ngēmacèx tama nagu taxī i ngēma nuxcūma ūmatūxū ga mugū, erū marū nūxna ítanguxū na Tupanaārū ngúchaū ixūgūxūcèx rū naxcèx na imaxèxūcèx namaã i tórū maxū i ngexwacaxūxū i Naã i Üünexū tūxna āxū.

*Ngēma pecadu i chowa ngēxmaxū rü chomaã inacuèx*

<sup>7</sup> ¿Rū ñuxū ñagūxū tá i ñuxmax? ¿Rū pexcèx rü yema mugū yīxū ga tūxū pecaduāxēxū? ¿Rū dücax, tama name i ngēmaãcū nagu tarūxīnūē! Natürü yexguma chi yema mugū rü tama choxū nūxū nacuèxēēgu, rü tãū chima nūxū chacuèx na pecadutūūwa chayexmaxū. Rū dücax, rü yexguma chi yema mugū rü tãū chima choxū nūxū cuèxēēgu na wūxi i pecadu yīxū na toguāxārū ngēmaxūcèx chixauxāchixū, rü tãū chima nūxū chacuèx na pecadu yīxū i ngēma.

<sup>8</sup> Natürü yexguma yema mugū choxū nguxēēgu na nachixexū na toguāxārū ngēmaxū choxū ngúchaūxū, rü yexguma ga pecadu rü nayoxniē na yexeraãcū choxū na nangúchaūxēēāxū. Rū ngēmaãcū nūxū tadau rü ngēxguma chi natauxgu i ngēma mugū, rü tãū chima nūxū tacuèxgū na ñuxācū wūxi i chixexūchixū na yīxū i ngēma pecadu.

<sup>9-10</sup> Rū noxri tauta yema mugūxū chacuèxgu, rü choma nagu charūxīnūgu rü chame. Natürü yexguma yema mugūxū chacuèxgu, rü nūxū chicuèxāchi na chixexū chaxūxū rü ngēma chixexūcèx rü tá na chayuxū. Rū yemaãcū ga yema mugū ga Tupana Moīchéna āxū



na duŭxŭgŭxŭ namaxēxēxŭcèx, rŭ choxŭ nayuxēēāma.

<sup>11</sup> Rŭ nŭma ga pecadu rŭ nayoxniē namaā ga yema mugŭ. Yerŭ yexguma yema mugŭ choxŭ nguxēēgu na ñuxācŭ nachixexŭ ga yema pecadu, rŭ yexeraācŭ choxŭ nangúchaŭ ga yema pecadu. Rŭ yemaācŭ ga yema pecadu rŭ choxŭ nawomŭxēē rŭ nayoxniē namaā ga yema mugŭ rŭ yuwa choxŭ naga.

<sup>12</sup> Natŭrŭ yema mugŭ rŭ aixcŭma naxŭŭne i Tupanapēxewa. Rŭ guxŭma i ngēma Tupana tamaā nŭxŭ ixuxŭ rŭ naxŭŭne rŭ aixcŭma name rŭ tŭxŭ narŭngŭxēē.

<sup>13</sup> ¿Natŭrŭ ñuxācŭ nixŭ i ngēma i ñuxmax? ¿Éxna pexcèx rŭ yema mugŭ yiŭxŭ ga yuwa choxŭ gaxŭ? Rŭ dŭcax, rŭ tama ngēmaācŭ nixŭ. Erŭ ngēma pecadu nixŭ i Tupanaārŭ mugŭmaā yoxniēxŭ na yuwa choxŭ nagaxŭcèx. Rŭ ngēmaācŭ nŭxŭ tacuèx na ñuxācŭ poraācŭ nachixexŭ i pecadu. Rŭ yexguma yema mugŭ choxŭ nguxēēgu na ñuxācŭ poraācŭ nachixexŭ ga yema pecadu, rŭ yexeraācŭ choxŭ nangúchaŭ ga yema chixexŭ rŭ yexeraācŭ chanaxŭama ga pecadu.

<sup>14</sup> Nŭxŭ tacuèx i ngēma mugŭ rŭ Tupanaāē i Ŭŭnexŭwa ne naxŭ. Natŭrŭ choma rŭ duŭxŭmare chixŭ, rŭ ngēmacèx nixŭ i chomaā inacuáxŭ i ngēma pecadu i chaxŭxŭ.

<sup>15</sup> Rŭ tama nŭxŭ chacuèx na ŭacu choxŭ ŭpetŭxŭ erŭ tama chanaxŭ i ngēma mexŭ i chanaxwèxexŭ na chaxŭxŭ, natŭrŭ ngēma chixexŭ i tama chanaxwèxexŭ na chaxŭxŭ rŭ ngēmaāma nixŭ i chaxŭxŭ.

<sup>16</sup> Natŭrŭ i ñuxma na chanaxŭxŭ i ngēma tama

chanaxwèchiréxŭ na chaxŭxŭ, rŭ ngēmawa nŭxŭ chicuèxãchi na namexŭ i ngēma mugŭ.

17 Rŭ ngēmacèx i ñuxma rŭ tama chauechama nixĩ i chanaxŭxŭ i ngēma chixexŭ. Natürŭ ngēma pecadu i chowa ngēxmaxŭ nixĩ i chomaã icuáxŭ, rŭ ngēma nixĩ i chixexŭ choxŭ ũxēēxŭ.

18 Rŭ choma nŭxŭ chacuèx rŭ wŭxi i pecaduãxŭ i duŭxŭmare chixĩ, rŭ ngēmacèx chowa rŭ nataxuma i tacŭ i mexŭ. Erŭ woo chanaxwèxe na mexŭ chaxŭxŭ, natürŭ tama chomaã nanguxŭ na chanaxŭxŭ.

19 Erŭ ngēma mexŭ i chanaxwèxexŭ na chaxŭxŭ, rŭ tama chanaxŭ. Natürŭ chanaxŭama i ngēma chixexŭ i tama chanaxwèxexŭ na chanaxŭxŭ.

20 Rŭ ngēxguma chi chanaxŭamagu i ngēma chixexŭ i tama chanaxwèxexŭ na chaxŭxŭ, rŭ meãma nangox na tama chauechama chanaxŭxŭ. Natürŭ ngēma pecadu i chowa ngēxmaxŭ nixĩ i chomaã icuáxŭ rŭ chixexŭ choxŭ ũxēēxŭ.

21 Rŭ ngēmaãcŭ nŭxŭ chadau i ñuxãcŭ na chiŭxŭ. Rŭ ngēxguma mexŭ chaxŭxchaŭgu rŭ choxŭ natauxcha na chixexŭãma chaxŭxŭ.

22 Choma rŭ chauãēwa rŭ chorŭ me nixĩ i Tupanaãrŭ mugŭ, rŭ naga chaxĩnŭchaŭ.

23 Natürŭ ñãã chaxune i ñoma i naãnecŭãx ixĩxŭwa, rŭ nangēxma i tacŭ i tama naxŭxchaŭxŭ i ngēma chauãē naxwèxexŭ. Rŭ ngēma pecadu i chowa ngēxmaxŭ nixĩ i chomaã icuáxŭ rŭ chixexŭ choxŭ ũxēēxŭ.

24-25 Rŭ ngēmaãcŭ i choma rŭ chauãēwa chayan-guxēēchaŭ i Tupanaãrŭ mugŭ, natürŭ ñoma i naãnecŭãx i chaxune rŭ nanaxŭxchaŭ i ngēma nanaxwèxexŭ i pecadu. Rŭ taxucèxma chataãē i chomax. ¿Rŭ texé tá nŭxna choxŭ ítanguxuchixēē

i ñaã pecadu i chowa ngëxmaxŭ rü yuwa choxŭ gaxchaŭxŭ? Rü Tupanana moxë chaxã erü tórü Cori ya Ngechuchu ya Cristu rü tá choxŭ nüxna ínanguxuchixëë.

## 8

### *Tupanaãë i Üünexŭ naxwëxexŭãcüma tamaxë*

<sup>1</sup> Rü ñuxma ya Tupana rü marü taxucëxma nanapoxcue i ngëma duŭxŭgü i Ngechuchu ya Cristuarü duŭxŭgü ixŭgüxŭ.

<sup>2</sup> Erü Tupanaãë i Üünexŭ i Ngechuchu ya Cristu-gagu tüxŭ maxëxëëxŭ, rü nüxna tüxŭ ínanguxŭxëë i pecadu na tama yuwa tüxŭ nagagüxŭcëx.

<sup>3</sup> Rü yema taxüneärü ngúchaŭgü rü marü nüxŭ narüyexera ga yema mugü ga Moïché umatüxŭ. Rü yemacëx ga yema mugü rü taxucürüwa mexŭ tüxŭ naxüxëë. Natürü nüma ga Tupana rü marü nanaxü ga yema taxucürüwa naxüxŭ ga yema mugü. Yerü ga Tupana rü ñoma ga naãnewa nanamu ga Nanexŭchi. Rü woo taxüne i pecaduãxŭrüü nixŭ ga naxüne, natürü nüma ga Nane rü taguma napecaduãx. Rü nüma ga Nane rü tórü pecaducëx nayu, rü yemaãcü inayanaxoxëë ga norü pora ga yema pecadu ga taxünewa yexmaxŭ.

<sup>4</sup> Rü yemaãcü nanaxü ga Tupana na tüxŭ na natauxchaxŭcëx na yanguxëëxŭ i ngëma tüxŭ namuxŭ i ngëma mugü. Erü ñuxma rü tama ñoma i taxüne naxwëxexŭãcüma tamaxë, natürü Tupanaãë i Üünexŭ naxwëxexŭãcüma nixŭ i imaxëxŭ.

<sup>5</sup> Rü yíxema tümaxŭne naxwëxexŭãcüma maxëxë, rü naxcëx tadaugü i ngëma ñoma i naãnecŭãx

naxwèxexŭ. Natürü yíxema Tupanaãē i Üünexŭ naxwèxexŭãcüma maxēxē, rü ngēma Tupanaãē i Üünexŭ naxwèxexŭ nixī i naxcèx tadaugŭxŭ.

<sup>6</sup> Rŭ yíxema Tupanaãē i Üünexŭ naxwèxexŭcèx daugŭxe rŭ tataãēgŭ, rŭ tá tŭxŭ nangēxma i tŭmaârŭ maxŭ i taguma gúxŭ. Natürü yíxema tŭmaxŭne naxwèxexŭcèx daugŭxe rŭ ngēma rŭ tá yuwa tŭxŭ nagagŭ.

<sup>7</sup> Rŭ yíxema tŭmaxŭne naxwèxexŭcèx daugŭxe rŭ Tupanamaã tarŭxuwanŭgŭ. Rŭ tama Tupanaga taxīnŭēchaŭ erŭ taxucŭrŭwama naga taxīnŭē.

<sup>8</sup> Rŭ ngēmacèx ya yíxema tŭmaxŭneârŭ ngúchaŭwe rŭxīxē, rŭ taxucŭrŭwa Tupanaârŭ ngúchaŭ taxŭgŭ.

<sup>9</sup> Natürü ngēxguma aixcüma pewa nangēxmagu i Tupanaãē i Üünexŭ rŭ tama pexeneârŭ ngúchaŭ pexŭ, natürü Naãē i Üünexŭârŭ ngúchaŭ nixī i pexŭxŭ. Rŭ yíxema tama tŭxŭ nangēxmaxē i Tupanaãē i Üünexŭ i Cristu tŭxna āxŭ, rŭ tama Cristuarŭ duŭxŭ tixī.

<sup>10</sup> Natürü ngēxguma pewa namaxŭxgu ya Cristu, rŭ peãxē rŭ namaxŭ erŭ Cristugagu Tupana pexŭ nŭxŭ inayarŭngŭma i perŭ pepadugu. Rŭ woo i pexene rŭ pepadugagu tá nayuama, natürü peãxē rŭ Cristugagu tá namaxŭ, erŭ Tupana pexŭ nadau na pimexŭ.

<sup>11</sup> Rŭ ngēxguma pewa namaŭxgu i Naãē ya yima Tupana ga Ngechuchu ya Cristuxŭ írŭdaxēēcŭ, rŭ nümatátama ya yima Cristuxŭ írŭdaxēēcŭ tá wena nanamaxēē i pexene i yuxwèxexŭ, rŭ Naãē i Üünexŭ i pewa maxŭxŭ tá nixī i naxŭxŭ i ngēma.

<sup>12</sup> Rŭ ngēmacèx, Pa Chaueneēgŭx, rŭ tanaxwèxe

i Tupanaãrũ ngúchaũ taxũ, rũ tama tanaxwèxe i taxũne i pecaduãxũãrũ ngúchaũ taxũ.

13 Erũ ngẽxguma chi pexeneãrũ ngúchaũ pexũxgu rũ tá ipeyarũtauxe. Natürũ ngẽxguma Tupanaãe i Üünexũãrũ ngũxẽẽmaã ipeyanaxoxẽẽgu i ngẽma pexene ùxchaũxũ, rũ aixcũma tá pexũ nangẽxma i maxũ i taguma gúxũ.

14 Erũ guxãma ya yixema Tupanaãe i Üünexũ tümamaã icuáxe, rũ aixcũma Tupanaxãcũgũ tixĩgũ.

15 Yerũ tama penayauxgũ ga wũxi ga naãxẽ ga pecaduwa pexũ gagũxũ rũ ngemagagu wenaxarũ Tupanaarũ poxcucèx pemuẽ. Natürũ yema Naãxẽ ga peyauxgũxũ rũ Tupanaãxẽ i Üünexũ i naxacũgũ pexũ ixĩgũxẽẽxũ nixĩ. Rũ ngẽmatama Naãe i Üünexũ nixĩ i tũxũ rüngũxẽẽxũ na tama imuẽxũcèx na Tupanana ingaicamagũxũ rũ:

“Pa Chaunatũx”, ñagũxũ nüxũ.

16 Rũ ngẽmatama Naãe i Üünexũ nixĩ i aixcũma tũxũ nüxũ cuèxẽẽxũ na Tupanaxãcũgũ na ixĩgũxũ.

17 Rũ ñuxma na Tupanaxãcũgũ ixĩgũxũ i yixema, rũ nüxũ tacuèx rũ daxũguxũ i naãnewa tá tanayaxu i ngẽma mexũgũ i Tupana tũxna ãxchaũxũ. Rũ ngẽmaãcü Cristumaã tá tũxũ nangẽxma i tachica i mexũ i Tupanaxũtawa, erũ Cristurũ ngúxũ tingegũ na yixcũra wũxigu namaã mexũwa ingẽxmagũxũcèx.

### *Ngẽma mexũ i yixcũra tá nüxũ idauxũchiga*

18 Rũ dücax, choma nagu charũxĩnũ rũ ngẽma ngúxũ i ñuxma ñoma i naãnewa ingegũxũ, rũ taxuũma nixĩ i ngẽxguma nagu nanguxgu i ngẽma

mexŭ i yixcŭra t nŭxŭ idauxŭ i ngēxguma Cristu-  
maã ingēxmagŭgu i daxŭguxŭ i naãnewa.

19 Rŭ ñuxma rŭ guxŭma i tacŭ i Tupana ũxŭ  
rŭ taxŭ i norŭ ngŭchaŭmaã Ínananguxēēgŭ i ngēma  
ngunexŭ i nagu t nataeguxŭ ya Cristu na Tupana  
guxŭpēxewa naxãcŭgŭxŭ iwéxŭ.

20 Rŭ nŭxŭ tacuèxgŭ rŭ yexguma pecadu  
naxŭxgu ga guma nŭxŭraŭcŭ ga yatŭ rŭ yexguma  
nixŭ ga nachixexŭ ga guxŭma ga yema Tupana  
ũxŭ. Rŭ tama yema Tupana ũxŭarŭ ngŭchaŭ nixŭ  
ga yema, natŭrŭ yemaãcŭ nŭxŭ naxŭpetŭ yerŭ  
ga Tupana rŭ yemaãcŭ inaxuneta ga yexguma  
pecadu naxŭxgu ga guma yatŭ. Natŭrŭ i ñuxma  
rŭ guxŭma ga yema Tupana ũxŭ rŭ Ínananguxēē  
na ngēma chixexŭwa Ínanguxŭxŭcèx.

21 Erŭ ngēma ngunexŭ i Tupana t nagu nadexŭ  
i naxãcŭgŭ na naxŭtawa nangēxmagŭxŭcèx, rŭ  
ngēxguma t ta nixŭ i chixexŭwa Ínanguxŭxŭēēãxŭ i  
guxŭma ga yema nŭmatama naxŭxŭ. Rŭ ngēmaãcŭ  
wenaxarŭ noxrirŭ t name i guxŭma.

22 Rŭ nŭxŭ tacuèx rŭ ñaa naane rŭ guxŭma  
i nawa ngexmaxŭ rŭ ñoma wŭxi i nge i ixrax-  
acŭchaxŭcŭrŭxŭ poraãcŭ ngŭxŭ ninge ñuxmatta  
nawa nangu i ngema ngunexŭ i nagu Tupana  
wena nangexwacaxŭxŭcèx i guxŭma..

23 Rŭ tama ñaa naanexŭcatama nixŭ i ngŭxŭ  
ingexŭ i ñuxma, natŭrŭ yixema i tŭxŭ ngex-  
maxŭ i Tupanaãxē i Ũŭnexŭ rŭ ta ngŭxŭ tingegŭ  
ñxmatta nawa nangu na Tanatŭ tŭxŭ dexŭ rŭ  
ngexwacaŭxŭ i taxŭnegŭ tŭxna ãxŭ. Rŭ woo  
tŭxŭ nangexma i Naãxē i Ũŭnexŭ ya Tupana tŭxna  
muxŭ na norŭ ũgŭ yixŭxŭcèx i ngema mexŭgŭ i

Tupana tá tūxna naxāxū i dauxūguxū i naanewa, natürü tanaxwèxe na ngemaxūchi ingugūxū.

<sup>24</sup> Cristu tūxna nanaxā i maxū i taguma gúxū, natürü ítananguxēēgūmare na naxū-tawa ingugūxū na nayauxgūxūcèx i ngēma maxū. Natürü nüxū tacuèx rü ngēxguma chi marü nüxū idaugūgu i ngēma írünguxēēgūxū, rü taxucèxma tūxcūü ítananguxēēgū. Erü ngēma marü nüxū idauxū, rü taxucèxma ítananguxēē.

<sup>25</sup> Natürü ngēxguma tauta nüxū idaugūgu i ngēma írünguxēēgūxū, rü tanaxwèxe i meā ítananguxēēgūecha ñuxmatáta nüxū idaugū. Rü ngēmaācü nixī i Cristuxū írünguxēēgūxū.

<sup>26</sup> Rü Tupanaāē rü tūxū narüngūxēē ta na ipo-raexūcèx i ngēxguma ituraegu i tórü ōwa. Rü yixema rü tama nüxū tacuèx na ñuxācü Tupanamaā idexagūxū rü tacūcèx iyumūxēgūxū. Natürü Naāē i Üünexū rü naxauxācüma ore i tama nüxū icuáxūmaā Tupanamaā nidexa rü taxcèx nayumūxē.

<sup>27</sup> Rü Tupana ya meā tūxū cuácü rü nüxū nacuèx na ñuxū ñaxūchiga yīxū i ngēma Naāē i Üünexū nüxū ixuxū. Erü ngēma Naāē i Üünexū rü Tupana naxwèxexūācüma Tupanaxū nacèèxū tūmacèx ya yixema Tupanaārü duūxūgū ixīgūxe.

*Cristu rü tūxū naporaxēēāma na taxuūma i gux-chaxūgū tūxū narü-yexeraxūcèx*

<sup>28</sup> Rü nüxū tacuèx rü tūmaārü mexūcèx nixī i Tupana ítanguxēēxū i guxūma i ngēma tūxū üpetūxū ya yixema nüxū ngechaūgūxe ga nüma nanaxwèxexūācüma tūxū nadexe.

29 Rū woetama nuxcūmama ga Tupana rü marü tüxü nacuèx na texégü tá tixīgüxü ya yixema noxrü ixīgüxe. Rū noxritama naāne ixügügumama tüxü nade na Nanerüü timexü i napëxewa, rü yima Nane rü tümamaã nayaxüçèx rü tümamaã inacuáxüçèx ya guxāma ya yixema naēneēgü ixīgüxe.

30 Rū guxema noxri naāne ixügügumama Tupana tüxü dexe, rü tümacèx naca na noxrü tixīgüxüçèx. Rū guxema tümacèx naçaxe, rü nügücèx tüxü nimexēēgü. Rū guxema nügücèx tüxü yamexēēgüxe, rü daxüwa tá tüxü nagagü na guxügutáma naxütawa tangëxmagüxüçèx.

31 ¿Rü ñuxü ñagüxü tá i ñuxma i ngēmachiga? Rū ngëxguma Tupana taétüwa chogügu, ¿rü texé tá tüxü rüyexeraxü?

32 Yerü nüma ga Tupana rü tama tüxna nayanuxü ga Nanexüchi. Natürü taxcèx inanamu ga Nane na taxcèx nayuxüçèx i guxāma i yixema. Rū ñuxma na yemaãcü taxcèx inamuãxü ga Nane, ¿rü taux éxna tüxna naxãaxü i guxüma i tacü i inaxwèxexü na naxcèx imaxëxüçèx?

33 Rū Tupana tüxü nade rü tüxü nixu na napëxewa imexü. Rū ngëmacèx ¿rü texé tá napëxewa tüxü tixugü na ichixexü? Erü Tupanatama nixi ya tüxü ixucü na tüxü nataxuüma i chixexü.

34 ¿Rü texé tá poxcuwa tüxü tamugü i ñuxmax? ¿Pexcèx rü Cristu tá yiixü? Düçèx, taxucürüwama ngëmaãcü nixi yerü Cristu nixi ga taxcèx yucü na tüxü namaxëxëxüçèx. Rü tama ngëxicatama taxcèx naxü, natürü wenaxârü ínarüda. Rū ñuxma rü Tupanaxütawa nangëxma rü ngema äëxgacü nixi. Rū ngema taétüwa nachogü rü Tupanaxü



taxcèx nacèèxŭ.

<sup>35</sup> ȷRŭ ñuxma rŭ ȳacŭ tá Cristuna tŭxŭ ixĩgachixèèxŭ na tama tŭxŭ nangechaŭxŭcèx? Rŭ woo ngúxŭ ingegŭgu, rŭ ěxna guxchaxŭgŭ tŭxŭ ngĕxmagu, rŭ ěxna duŭxŭgŭ Cristugagu taxchi aiegu, rŭ ěxna itaiyaegu, rŭ ěxna ingexchirugŭgu, rŭ ěxna āũcŭmaxŭwa ingĕxmagŭgu, rŭ ěxna duŭxŭgŭ tŭxŭ daixchaŭgu, natŭrŭ woo guxŭma i ngĕma tŭxŭ ũpetŭgu, natŭrŭ ya Cristu rŭ tãŭtãma nŭxŭ narŭchau na tŭxŭ nangechaŭxŭ.

<sup>36</sup> Natŭrŭ guxŭguma āũcŭmaxŭwa tangĕxmagŭ, ngĕma Tupanaãrŭ ore i ũmatŭxŭ nŭxŭ ixuxŭrŭŭ. Erŭ ngĕma ore rŭ ñanagŭrŭ:

“Rŭ cugagu duŭxŭgŭ toxŭ nadaixchaŭ rŭ duŭxŭgŭpĕxewa rŭ ñoma carnerugŭ i daiwa ĩxŭrŭŭ tixĩgŭ”,

ñanagŭrŭ i ngĕma ore.

<sup>37</sup> Natŭrŭ woo guxŭma i ngĕma tŭxŭ na ngupetŭxŭ, rŭ Ngechuchu ya Cristu ya tŭxŭ ngechaŭcŭ, rŭ tŭxŭ naporaexèèãma na taxuŭma i guxchaxŭgŭ tŭxŭ narŭyexeraxŭcèx, rŭ bai i ȳacŭ.

<sup>38-39</sup> Rŭ ngĕmacèx aixcŭma chayaxŭ na taxucŭrŭwama ȳacŭ Tupanana tŭxŭ ixĩgachixèèxŭ na ngĕmaãcŭ tama tŭxŭ nangechaŭxŭcèx. Rŭ woo iyuxgu rŭ woo imaxĕgu, natŭrŭ Tupana tá tŭxŭ nangechaŭĕcha. Rŭ taxucŭrŭwama Tupanana tŭxŭ nixĩgachixèè i ȳacŭ i norŭ orearŭ ngeruŭgŭ, rŭ ěxna ȳacŭ rŭ ngoxogŭ rŭ ěxna ȳacŭ i to i poraxŭ. Rŭ bai i ȳacŭ i ñuxma tŭxŭ ũpetŭxŭ, rŭ bai i ȳacŭ i yixcŭra tá ngĕxmaxŭ, rŭ bai i ȳacŭ i daxŭwa ngĕxmaxŭ, rŭ bai i ȳacŭ i naãnetŭŭwa ngĕxmaxŭ, rŭ bai i ȳacŭ i to i Tupana ũxŭ, rŭ taxucŭrŭwama Tupanana tŭxŭ nixĩgachixèè na

tama tūxŭ nangechaŭxŭcèx. Rŭ ngēmaãcŭ nixĩ i tūxŭ nangechaŭxŭ ya Tupana nagagu ya tórŭ Cori ya Ngechuchu ya Cristu.

## 9

### *Tupana rŭ nanade i Yudíugŭ na norŭ duŭxŭgŭ na yixŭgŭxŭcèx*

<sup>1</sup> Dŭcèx, Pa Chaueneēgŭx, rŭ pemaã tá nŭxŭ chixu i wŭxi i ore. Rŭ ngēma ore i pemaã tá nŭxŭ chixuxŭ rŭ aixcŭma nixĩ erŭ Cristuarŭ duŭxŭ chixĩ. Rŭ tama chidora. Rŭ chauãēwatama nŭxŭ chacuèx na aixcŭma na yĩxŭ i ngēma ore erŭ Tupanaãe i Ũnexŭ nixĩ i chauãēmaã icuáxŭ.

<sup>2</sup> Rŭ poraãcŭ changechaŭ, rŭ choxŭ nangúecha i chauãēwa, erŭ tama nayaxōgŭ i chautanŭxŭgŭ i Yudíugŭ.

<sup>3</sup> Rŭ aixcŭma pemaã nŭxŭ chixu rŭ guxŭguma ngēma chautanŭxŭgŭ charŭxĩnŭ, rŭ poraãcŭ chanaxwèxe na Cristuaxŭ yaxōgŭãxŭ. Rŭ choma rŭ aixcŭma íchamemare na poxcuwa choxŭ namuxŭ ya Tupana rŭ Cristuna choxŭ yaxŭgachixēxŭ ega ngēmaãcŭ chi nŭxŭ chayaxōgŭxēēgu rŭ chanamaxēxēēgu i ngēma chautanŭxŭgŭ i Yudíugŭ.

<sup>4</sup> Rŭ nŭmagŭ rŭ chauxrŭŭ Yudíugŭ nixŭgŭ. Rŭ Tupana rŭ nuxcŭmaxŭchima namaã inaxuneta na naxãcŭgŭ yixŭgŭxŭcèx. Rŭ norŭ oxigŭ rŭ nŭxŭ nadaugŭ na ñuxãcŭ namexēchixŭ ga Tupana ga yexguma naxcèx nangoxgux. Rŭ Tupana rŭ norŭ oxigŭmaã inaxuneta rŭ ñanagŭrŭ nŭxŭ:

“Rŭ ngēxguma chauga pexĩnŭēgu rŭ tá pexŭ charŭngŭxēē”,

ñanagürü nüxü. Rū Tupana rū nüxna nanaxã ga yema mugü ga Moïché ūmatüxü. Rū nanangúexëẽ na ñuxãcü nüxü yacuèxüügüxücèx. Rū meãma namaã inaxuneta na Cristu rū naxcèx núma tá namuãxü na namaxëxëãxücèx rū nüxna na naxããxücèx i maxü i taguma gúxü.

<sup>5</sup> Rū yema nuxcümaügüxü ga tórü oxigütaa nixīgü i ngëma Yudíugü, rū ngëmacèx naxcèx ta nixĩ ga yema uneta ga tórü oxigümaã nüxü yaxuxü ga Tupana. Rū ngëma Yudíugütanüxüwatama nixĩ ga nabuxü ga Cristu ya Tupanaxüchi ixĩcü ya guxüetüwa ngëxmacü. Rū tanaxwèxe i guxüguma nüxü ticuèxüügü. Rū ngëmaãcü yĩ.

<sup>6</sup> Rū ñuxma rū woo tama guxü i Yudíugü na yaxögüxü, natürü taxucürüwama texé nüxü tixu na Tupana rū tama yanguxëãxü i ngëma norü uneta. Erü ngëma Yudíugü rū tama aixcüma guxüma Tupanaärü duüxügü nixīgü.

<sup>7</sup> Rū tama guxüma i duüxügü i Abráütaagü ixīgüxü, rū aixcüma Abráütanüxü nixīgü i Tupanapëxewa. Yerü ga Tupana rū Abráümaã nüxü nixu, rū ñanagürü:

“Rü cune ya Ichaátanüxügü tá nixĩ i aixcüma cutanüxügü ixīgüxü i chopëxewa”,  
ñanagürü. Rū yemaãcü namaã inaxuneta woo na nayexmaxü ga togü ga Abráüxãcügü.

<sup>8</sup> Rū ngëmawa meãma nüxü tacuèx rū tama ngëma na Abráütaa tixīgüxücèx nixĩ i Tupanaxãcügü tixīgüxü. Natürü yíxema aixcüma Tupanaärü uneta nüxü ixuxürüüãcüma yaxögüxe waxi tixĩ ya aixcüma Abráütaa ixīgüxe i Tupanapëxewa.

<sup>9</sup> Yerü naxüpa ga na nabuxü ga Abráü nane, rū yema Tupanaärü uneta ga Abráümaã nüxü yax-

uxŭ, rŭ ñanagŭrŭ:

“Rŭ naĩ ya taunecŭarŭ ñŭxgumaãcŭ tá wena nuã  
chaxŭ, rŭ cuxmèx i Chara rŭ tá ixãxãcŭ i  
ngèxguma”,

ñanagŭrŭ.

<sup>10</sup> Natŭrŭ tama Abráŭmaãxĩcatama nixĩ ga  
yemaãcŭ yadexaxŭ ga Tupana. Yerŭ tŕrŭ oxĩ  
ga Ichaá namèx ga Rebecamaã rŭ ta nidexa  
ga Tupana. Rŭ ngĩma rŭ ngĩteaxŭ ixãxãcŭ rŭ  
nataxreèxpŭx ga ngĩne.

<sup>11-13</sup> Natŭrŭ yexguma tauta nabuegu rŭ taxuŭma  
ga mexŭ rŭ èxna chixexŭ naxŭegu ga yema  
ngĩnegŭ, rŭ Rebecamaã nidexa ga Tupana, rŭ  
ñanagŭrŭ:

“Rŭ ngèma nŭxĩra buxŭ i cune, rŭ ngèma  
wixweama buxŭãrŭ duŭxŭ tá nixĩ”,

ñanagŭrŭ ngĩxŭ. Rŭ yema dexa rŭ namaã  
nawŭxigu i Tupanaãrŭ ore i ũmatŭxŭ i ñaxŭ:

“Marŭ chanayaxu ya Acobu, natŭrŭ nŭxŭ chaxo  
ya Echaú”,

ñaxŭ. Rŭ yemaãcŭ ga Tupana rŭ ngĩmaã  
nanangoxèè na namèxwa nangèxmaxŭ na tŭxŭ  
nayaxuxŭ ya yĩxema woetama nŭxŭ ngŭchaŭxè na  
tŭmacèx naçaxŭ tama nagu naxĩnŭãcŭma i tacŭ rŭ  
mexŭ rŭ èxna tacŭ rŭ chixexŭ na taxŭxŭ.

<sup>14</sup> ¿Rŭ ñuxŭ ñagŭxŭ i ñuxmax? ¿Pexcèx rŭ Tupana  
rŭ chixexŭ naxŭxŭ ga yexguma tama Acobuxŭ  
nangechaŭxŭrŭrŭ nŭxŭ na nangechaŭgu ga  
Echaú? Rŭ dŭcax, tama chixexŭ naxŭ.

<sup>15</sup> Yerŭ norŭ orewa rŭ Tupana rŭ Moĩchéxŭ  
ñanagŭrŭ:

“Rŭ ngèxguma chi texémaã chamecŭmachaŭgu,  
rŭ tŭmamaã tá chamecŭma. Rŭ choxŭ

tá tangechaŭtümüŭ ya yíxema choxŭ  
ngechaŭtümüŭchaŭxē”,  
ñanagürü.

16 Rŭ ngēmaācŭ tama ngēma tŭmatama  
tanaxwèxexŭgagu rŭ ěxna ngēma taxŭxŭgagu  
nixĩ i Tupana tŭxŭ yaxuxŭ ya texé. Natürŭ tŭxŭ  
nayaxu erŭ nüxŭ tangechaŭtümüŭ.

17 Rŭ yexgumarŭŭ ta ga Tupana rŭ norŭ ore i  
ümatŭxŭwa rŭ ñanagürŭ nüxŭ ga Equituaneärŭ  
ãëxgacŭ:

“Rŭ ãëxgacŭxŭ cuxŭ chingucuchixēē na cuwa  
duŭxŭgŭxŭ nüxŭ chadauxēēxŭcèx i  
ñuxācŭ na chaporaxŭ. Rŭ ngēmaācŭ  
chanaxŭ na guxŭ i duŭxŭgŭ i guxŭ i  
naānewa ngēxmagŭxŭ, nüxŭ na cuáxŭcèx  
i chauchiga”,

ñanagürŭ.

18 Rŭ ngēmaācŭ ya Tupana rŭ nüxŭ  
tangechaŭtümüŭ ya yíxema nüxŭ  
ngechaŭtümüŭchaŭxē. Rŭ ngēxguma tŭxŭ  
nataiāchiarŭ maxŭāxēēchaŭgu rŭ tŭxŭ  
nanataiāchiarŭ maxŭāxēē ya yíxema tama nüxŭ  
cuáxchaŭxē.

19 Natürŭ bexmana tá ñacurŭgŭ choxŭ:

“Rŭ ngēxguma chi ngēmaācŭ yixĩgu ya Tupana,  
¿rŭ tŭxcŭŭ nüxŭ nixu na tagagu yixŭ na chixexŭ  
ixŭgŭxŭ rŭ tama naga ixĩnüēxŭ? ¿Rŭ texé tabora  
na itayanaxoxēēxŭcèx i Tupanaärŭ ngŭchaŭ?”  
ñacurŭgŭ tá.

20 Natürŭ Pa Duŭxŭx, ¿texé quixĩ i cuma rŭ  
ngēmacèx ngēmaācŭ Tupanaxŭ cuyaxŭgaxŭ?  
¿Cuxcèx rŭ ěxna wŭxi i tŭxŭ i waixŭmŭwa ŭxŭ  
rŭ namexŭ i ngēma norŭ ũruŭmaã na ñaxŭ?

“¿Rü tüxcüũ ngēmaãcü choxũ cuxü na ngēmaãcü chixĩüçèx i ñuxmax?” ñaxũ.

21 Rü ngēma tüxũãrũ üruũ rü waixũmüwa nanaxü i tacü i nüma naxüxchaũxũ. Rü ngēxguma nanaxwèxegu, rü ngēma waixũmüwa nanaxü i wüxi i tüxü na norü meruũ yĩxüçèx. Rü ngēxguma nanaxwèxegu, rü ngēmatama waixũmüwa nanaxü i wüxi i tüxü na norü guxchirechixü yĩxüçèx.

22 Rü ngēxgumarüütama nixĩ i naxüãxü ya Tupana. Erü tüxü nanawéxchaũ na ñuxãcü naporaxü i nüma rü ñuxãcü napoxcueãxü i ngēma duũxügü i chixexü ügüxü, natürü poraãcü yaxna namaã naxĩnü i ngēma duũxügü, rü tama paxa nanapoxcue i ngēma ímemaregüxü na napoxcuexü.

23 Natürü ga Tupana rü inanawéxchaũ na ñuxãcü poraãcü tamaã namecümamaxü i yixema na yaxõgüxü. Rü ngēmacèx nixĩ i nüxü ingechaũtümüügüxü, rü nuxcümamatama tüxü nadexü na naxütawa ingēxmagüxüçèx i daxügüxü i naãnewa i ngextá ínamexèchixüwa.

24 Rü ngēmaãcü i yixema na Yudíugü ixíügüxü, rü tatanüwa Tupana tüxü nidexechi ya ñuxre na norü duũxügü tixíügüçèx. Rü ngēxgumarüũ ta i ngēma tama Yudíugü ixíügüxütanüwa rü nayadexechi i togü.

25 Rü ngēmacèx rü Tupanaãrũ ore ga Ochéa ümatüxüwa rü ñanagürü:

“Rü ngēma duũxügü i tama chorü duũxügüchirëx ixíügüxü, rü: ‘Pema rü chorü duũxügü pixíügü i ñuxmax’, ñacharügü tá nüxü. Rü ngēma duũxügü i tama Yudíugürü nüxü changechaũchiréxü, rü: ‘Pexü changechaũ i ñuxmax’, ñacharügü tá nüxü.

26 Rū noxri ga Tupana rū yema duūxūgū ga tama Yudíugū ixīgūxūmaã nūxū nixu, rū ñanagürü nūxū: ‘Pema rū tama chorü duūxūgū pixīgū’, ñanagürü nūxū. Natürü yematama nachica ga ngextá nūxū íyemañaxūwa, rū wenaxārü yema duūxūgū ga tama Yudíugū ixīgūxūmaã nidexa ga Tupana ya Maxēxēeruū, rū ñanagürü nūxū: ‘Pema rū chaux-acügü tá pixīgū’, ñanagürü nūxū”.

Rū yema nixī ga Tupanaārü ore ga Ochéa ümatüxū.  
27-28 Rū Yudíugüchiga rū ta nidexa i Tupanaārü ore, yerü nuxcūmaücü ga norü orearü uruū ga Ichaxía rū ñanagürü:

“Rū woo namuxūchichirēx i Yudíugü yima naxnücü ya taxtüpechinüwa yimacürüü, natürü noxre tátama nixī i aixcūma nayauxgūxū i maxū i taguma gūxū. Rū paxa tá ínangu ya tórü Cori na napoxcueāxūcèx i guxūma i ngēma tama noxrü ixīgūxū”, ñanagürü ga Ichaxía.

29 Rū nümatama ga Ichaxía, rū ñanagürü ga ũpa:

“Rū ngēxguma chi nüma ya tórü Cori ya guxū i naāneārü yora rū tãū chima íyaxügüxēēāgu i ñuxre i tatanüxūgü i Yudíugü, rū chi itayarūxoxochi, yexgumarüü ga na iyanaxogūxū ga guma ñānegü ga Chodoma rū Gomora namaã ga guxūma ga yema duūxūgü ga yéma yexmagūxū”, ñanagürü ga Ichaxía.

*Yudíugü rū tama nayaxōgüchañ i ore i mexü i Cristuchiga*

30 ¿Rū ñuxū ñagūxū i ñuxmax? Rū pemaã nūxū chixu rū ngēma duūxūgü i tama Yudíugü

ixīgüxü ga tama Tupanacèx daugüxü ga noxrix, rü ngēmatama duüxügü nixī i ñuxma Tupanapëxewa imexü yerü nayaxögü.

<sup>31</sup> Natürü yema Yudíugü ga nagu íxchaüxü ga yema Moíchéarü mugü na Tupanapëxewa yamexücèx, rü ínatüe.

<sup>32</sup> ¿Rü ñuxácü ínatüe? Dücèx, ínatüe yerü yema mugüguama naxī na Tupanapëxewa yamexücèx, rü tama Ngechuchuaxü nayaxögüchaü. Rü yemaácü ga Ngechuchu rü yema duüxügücèx rü wüxi ga guxchaxü nixī.

<sup>33</sup> Rü ngēmachiga nixī i Tupanaärü ore i ümatüxü i ñaxü:

“Choma rü Yudíugütanüwa chanamu ya Cristu. Rü nüma rü ngēma Yudíugücèx rü wüxi i guxchaxü tá nixī erü ngëxguma tama nüxü yaxögüägu rü tá inayarütauxe. Natürü ngēma duüxügü i nüxü yaxögüxü, rü aixcüma tá namaxë”, ñanagürü.

## 10

<sup>1</sup> Pa Chaueneëgüx, rü ngēma poraácü chanaxwèxexü rü chorü yumüxëwa Tupanana naxcèx chaçaxü, rü ngēma nixī na guxüma i chautanüxügü i Yudíugü na yaxögüxü rü ngēmaácü aixcüma Tupanaärü na yixīgüxücèx.

<sup>2</sup> Rü aixcüma pemaã nüxü chixu, rü nümagü i Yudíugü rü aixcüma poraácü Tupanagu narüxínüë rü nanaxügüchaü i Tupanaärü ngüchaü. Natürü ínatüe erü tama Cristuaxü nayaxögüchaü na ngēmaácü Tupanapëxewa yamexücèx.



<sup>3</sup> Rū woo Tupana ñoma ga nañnewa nanamu ga Cristu na gumagagu Tupanapēxewa yamexūcèx i duūxūgū, natürü nūmagü i Yudíugü rü tama nūxū nacuèxgüchaū i ngēma. Rū nūgütama nimexēēgüchaū, rü ngēmacèx nagu naxīāma i ngēma mugü ga Moīché ümatūxū rü tama Cristuaxū nayaxōgüchaū na nagagu Tupanapēxewa yamexūcèx.

<sup>4</sup> Natürü nūma ga Cristu rü nayanguxēē ga yema mugü rü yemaācü inayanaxoxēē na tama tamaā inacuáxūcèx i ngēma mugü. Rū yemaācü nanaxü ga Cristu na guxūma i duūxūgü i nūxū yaxōgüxū rü aixcüma Tupanapēxewa yamexūcèx.

<sup>5</sup> Rū Moīché nanaxūmatü nachiga na ñuxācü Tupanapēxewa tamexū ya wūxie ega naga taxīnūgu i ngēma mugü, rü ñanagürü:

“Tupana pexū namu na guxūgutáma meā peyanguxēēxū i guxūma i ngēma mugü erü ngēxguma naga pexīnūēgu i guxūma i ngēma mugü rü tá pemaxē. Natürü ngēxguma tama naga pexīnūēgu i wūxitama i ngēma mugü, rü tāūtáma pemaxē”,

ñanagürü.

<sup>6</sup> Natürü ñuxma rü Tupanapēxewa time ega Cristuaxū yaxōgügu. Rū ngēmacèx taxucèxma i cuāēwa rü ñacurügü:

“¿Texé tá daxūguxū i nañnewa taxū na Cristucèx tayaçaxū na nuā naxūxūcèx rü tüxū yanangūxēēxūcèx na imexūcèx i Tupanapēxewa?” ñacurügü.

<sup>7</sup> Rū taxucèxma cuāēwa ñacurügü:

“¿Rü texé tá yuexūtanüwa taxū na ngēxma Cristucèx tayadauxūcèx na nuā tanagaxūcèx?”

ñacurügü.

<sup>8</sup> Erü tama ngēmaācü nixī i Cristucèx idauxü, yerü yema ore ga Moïché ümatüxü rü ñanagürü:

“Rü marü cuxütawa nangēxma i Tupanaärü ore. Rü cuèxwa nangēxma na nüxü quixuxücèx. Rü cuãewa nangēxma na nagu curüxĩnüxücèx”,

ñanagürü. Rü ñuxma Pa Chaueneëgüx, rü pemaã nüxü chixu rü ngēmatama ore nixī i guxüwama duüxügümaã nüxü tixuxü. Rü ngēma ore nixī i pexü nüxü cuèxëexü na ñuxäcü pexü nangēxmaxü i maxü ega aixcüma peyaxögügu.

<sup>9</sup> Erü ngëxguma cuèxmaã nüxü quixuxgu na curü Cori yīixü ya Ngechuchu, rü ngëxguma cuãewa cuyaxōxgu na yuwa Tupana ínadxëexü, rü tá cuxü nangēxma i maxü i taguma gúxü.

<sup>10</sup> Erü taãewa tayaxögü na ngēmaācü Tupanapëxewa imexü. Rü taèxmaã nüxü tixu na Ngechuchu rü tórü Cori yīixü, rü ngēmaācü tanayaxu i maxü i taguma gúxü.

<sup>11</sup> Rü Tupanaärü ore i ümatüxüwa rü ñanagürü:

“Rü guxãma ya yíxema ya Ngechuchuaxü yaxōxë, rü nüma ya Ngechuchu rü taxútáma tüxü narümaächixëë erü tá nayanguxëë i guxüma i ngema tümamaã inaxunetaxü”,

ñanagürü.

<sup>12</sup> Rü Tupanapëxewa rü guxüma i duüxügü rü nawüxigu. Rü woo Yudíugü yixígu rü éxna woo tama Yudíugü yixígu, natürü Tupanapëxewa rü nawüxigu i guxüma i duüxügü. Erü nüma ya tórü Cori, rü guxãärü Cori nixī. Rü nüma rü aixcüma tüxü namaxëxëë ya guxãma ya texé ya nüxna çaxe na tüxü namaxëxëëxücèx.

13 Erü Tupanaärü ore i ümatüxüwa rü ñanagürü:  
 “Rü guxāma ya texé ya tórü Corina çaxe na  
 tūxna naxāxücèx i maxü, rü tá tanayaxu i  
 tūmaärü maxü i taguma gúxü”,

ñanagürü.

14 ¿Natürü ñuxácü tá tórü Corina naxcèx tacagü,  
 ega tama nüxü tayaxögügu? ¿Rü ñuxácü tá nüxü  
 tayaxögü, ega taguma nüxü taxīnüëgu i nachiga?  
 ¿Rü ñuxácü tá nüxü taxīnüë i norü ore, ega taguma  
 texé tūmamañ nüxü ixuxgu?

15 ¿Rü ñuxácü tá texé nüxü tixu i Cristuchiga ega  
 taxüema tūxü nüxü yarüxuxëëgu? Rü ngēmacèx  
 nixī i Tupanaärü ore i ümatüxü i ñaxü:

“Rü wüxi i taäë nixī na íngugüxü i Tupanaärü  
 orearü uruügü na duüxügümañ nüxü  
 yaxugüxücèx i Tanatüarü ore i mexü i  
 Cristuchiga”,

ñaxü.

16 Natürü tama guxüma i duüxügü naga naxīnüë i  
 ngēma ore i mexü. Rü Ichaxía nüxü ixuxürüü nixī.  
 Yerü ga nüma rü ñanagürü:

“Pa Corix, noxretama nixī i ngēma duüxügü i toxü  
 yaxögüxü i ngēma ore i nüxü tixuxü”,

ñanagürü.

17 Rü dücax, rü ngēma na Cristuchigaxü  
 naxīnüëxüwa nixī i ne naxüxü na yaxögüaxü i  
 duüxügü. Rü ngēma nüxü naxīnüëxü, rü ore i  
 mexü i Cristuchiga nixī.

18 Natürü i ñuxma rü pexna chaca, ¿éxna pexcèx rü  
 ngēma Yudíugü rü taguma nüxü naxīnüë i ngēma  
 ore i mexü i Cristuchiga? Dücèx, ngēmaácü marü  
 nüxü naxīnüë. Erü Tupanaärü ore i ümatüxüwa rü  
 ñanagürü:

“Rü ngēma Tupanaärü orearü uruügü, rü guxūwama i ñoma i nañewa rü nüxū nixugüe i norü ore. Rü ngextá ínangēxmagūxūwa i Yudíugü, rü ngēma rü ta nüxū nixugügü”,

ñanagürü i ngēma ore.

<sup>19</sup> Natürü wena pexna chaca, ¿rü ngēma Yudíugü rü tama ēxna nüxū nicuēxāchitanü na Cristugagu yīxū na Tupana nadexū i duūxügü i ñuxmax? Rü ngēamáacü nüxū nacuēxgü. Yerü Tupanaärü ore ga Moiché ümatūxūwa rü ñanagürü:

“Dücèx, Pa Yudíugüx, choma rü tá chanamaxēxē i ngēma duūxügü i tama Yudíugü ixīgüxū, rü ngēmacèx i pema rü tá pixāūxāchigü. Rü ngēxguma chanamaxēxēgu i ngēma togü i duūxügü i tama choxū cuēxgüchiréxū, rü pema i Yudíugü rü tá penuē erü nüxū charüngüxē i ngēma togü”,

ñanagürü.

<sup>20</sup> Rü yemawena ga Ichaxía, rü tama namuñ ga yema Yudíugümañ nüxū na yaxuxū ga yema Tupanaärü ore ga ñaxū:

“Rü ngēma duūxügü i tama Yudíugü ixīgüxū i tama chauxcèx daugüxū, rü choxū tá inayangaugü. Rü choma rü tá chaugü changoxē naxcèx i ngēma duūxügü i tama chauxcèx ícagüchiréxū”,

ñaxū.

<sup>21</sup> Rü Tupana rü Ichaxíawa Yudíugüchiga nidexa rü ñanagürü:

“Rü guxū i ngunexügu rü nüxna chaxuecha i ngēma duūxügü i tama chauga ñnüēchaūxū

rü chomaã nuẽxũ. Natürü tama choxũ  
 inarüxĩnũẽchaũ”,  
 ñanagürü.

## 11

*Nangẽxma i ñuxre i Yudíugü i Tupana dexũ na  
 aixcuma noxrü yixĩgüxũcèx*

<sup>1</sup> Ñuxma pexna chaca rü, ¿pexcèx ãxna ya Tu-  
 pana rü marü nüxũ naxo i norü duũxũgü i  
 Yudíugü? Tama nixĩ i nüxũ naxoxũ. Erü choma i  
 Pauru rü Yudíu chixĩ. Rü Abráũtanũxũ chixĩ, rü  
 Abráũtaa ya Beyamítanũxũ chixĩ.

<sup>2</sup> Rü nuxcũmamatama Tupana Yudíugümaã inax-  
 uneta na norü duũxũgü yixĩgüxũcèx, rü ñuxma rü  
 tama Yudíugüxũ naxo. ¿Tama ãxna nüxũ pecuèx  
 na ñuxũ ñaxũ ga Tupanaãrü orearü uruũ ga Ería?  
 Rü Tupanaãrü orewa nüxũ tadaugü rü Ería rü  
 Tupanapẽxewa poraãcü yema Yudíugüxũ nixugü.

<sup>3</sup> Rü ñanagürü ga Ería:  
 “Pa Corix, ngẽma Yudíugü rü marü nanadai i  
 curü orearü uruũgü. Rü nagu napogüe  
 i ngẽma nachicagü i ngextá duũxũgü  
 cuxũ ícuèxüũgüxũwa. Rü chaxicatama  
 íchayaxüãchi. Rü choxũ rü ta nimèxgüchaũ”,  
 ñanagürü ga Ería.

<sup>4</sup> Natürü Tupana nanangãxũ, rü ñanagürü:  
 “Dücèx, choma rü marü choxũ nangẽxma i 7000  
 i yatügü i chaugüxũ chidexechixũ. Rü  
 nũmagü rü taguma nüxũ nicuèxüũgü i  
 ngẽma tupananetachicünèxã i Baá”,  
 ñanagürü.

<sup>5</sup> Rü ngẽxgumarüũ ta nixĩ i ñuxmax. Rü woo  
 muxũma i Yudíugü tama nayaxõgü, natürü

nangēxma i ñuxre i Tupana namaã mecūmaxūgagu dexū.

<sup>6</sup> Rū ñuxma na Tupana tūxū ngechaūxūgagu tūxū nadexū, rū taxucūrūwama texé nūxū tixu na tacū rū mexū na ixūgūxūgagu na yixīxū. Erū ngēxguma chi tacū rū mexū ixūgūxūgagu yixgu na tūxū nadexū, rū natūcèxmamare chi nixī na nūxū ingechaūtūmūxūgūxū.

<sup>7</sup> ¿Rū ñuxācū yīxū i ñuxmax? Rū ngēma rümumaēxū i Yudíugū rū tama nūxū inayangaugū i ngēma maxū i naxcèx nadaugūxū. Natūrū ngēma noxretama i Yudíugū i Tupana dexū, rū ngemagū nixī i nūxū iyangaugūxū. Rū guxūma ga yema togū ga Yudíugū rū Tupana ínanawogū yerū tama naga naxīnue.

<sup>8</sup> Rū ngēmachiga nixī i Tupanaārū ore i ümatūxū i ñaxū:

“Tupanatama ngēma duūxūgūaxū nanaguxchaxēē. Rū ngēmacèx woo nūxū nadaugūgu i ngēma ore i aixcūma ixīxū, rū tama nūxū nacuèxgūéga. Rū woo nūxū naxīnūēgu i ngēma ore, rū tama nayaxōgū. Rū ñuxma rū ta ngēmaācū nixī”,

ñanagūrū.

<sup>9</sup> Rū Dabí rū ta rū ñanagūrū:

“Rū ngēma duūxūgū rū norū petacèx naxūgūxū i ōnagūgagu rū norū muxūma i ngēmaxūgūgagu rū chixexūgu tá nayi rū ngēmacèx tá napoxcue.

<sup>10</sup> Rū naāēwa rū tāūtāma nūxū nacuèxgū, rū guxchaxūgū tá nūxū nangēxma. Rū ñoma wūxi i duūxū i tacū i yaxū ípaxixūrūū tá nixīgū namaã i norū guxchaxūgū”,

ñanagürü.

*Tupana nanamaxëxëë i ngëma tama Yudíugü ixīgüxü*

<sup>11</sup> Rū pexna chaca, rū ñuxma na Cristuxü naxoexü i ngëma Yudíugü, çrū pexcèx ëxna rū ngëmacèx ya Tupana rū tá nüxü naxoxochixü? Tama nüxü naxo. Natürü ñuxma na tama Cristuaxü yaxögüâxü i ngëma Yudíugü, rū ngëmacèx ya Tupana rū nüxü narüngüxëë rū nanamaxëxëë i ngëma tama Yudíugü ixīgüxü. Rū ngëmaäcü nanaxü ya Tupana na yaxäüxächieüçèx i ngëma Yudíugü, rū Cristuaxü na yaxögüâxüçèx.

<sup>12</sup> Rū yema na ínatüexü ga yema Yudíugü, rū yemagagu muxüma ga togü ga duüxügü nanayauxgü ga Tupanaärü ngüxëë i taxü. Rū yema na noxretama ga Yudíugü nayaxögüxü, rū yemagagu Tupana nanamaxëxëë ga yema tama Yudíugü ixīgüxü. Natürü ngëxguma tá Tupanacèx nawoeguxgu i guxüma i Yudíugü, rū Tupana rū tá yexeraäcü nüxü narüngüxëë i guxüma i ngëma duüxügü i tama Yudíugü ixīgüxü.

<sup>13-14</sup> Rū ñuxma Pa Duüxügü i Tama Yudíugü Ixīgüxüx, rū choxü nangëxma i wüxi i ore i pemaã nüxü chixuxchaxü. Rū dücax, petanüwa nixi i choxü namuxü ya Tupana na pemaã nüxü chixüçèx i norü ore. Rū ñuxma rū aixcüma meã chayanguxëë i ngëma puracü, erü chanaxwèxe na pexü nadaugüxü i ngëma chautanüxü i Yudíugü na ñuxäcü Tupana pexü na rüngüxëëxü. Rū ngëmaäcü tá nixäüxächie i ñuxre i nümagü, rū tá Cristuaxü nayaxögü, rū ngëmaäcü tá nanayauxgü i maxü i taguma gúxü.

15 Nūxŭ tacuèx rŭ ngēma Yudíugŭ rŭ tama Cristu-axŭ nayaxōgüchaŭ i ñuxmax. Rŭ ngēmacèx ya Tupana rŭ nanade i ngēma togŭ i duŭxŭgŭ i tama Yudíugŭ ixīgüxŭ. Natürŭ ñuxma na ngēmaäcŭ yīxŭ, ŷrŭ ñuxäcŭ tá nixī i ngēxguma Cristuaxŭ yaxōgüägu i ngēma Yudíugŭ, rŭ wena Tupana nadexgu? Rŭ wŭxi i mexēchixŭ tá nixī naxcèx i ngēma Yudíugŭ. Erŭ ñoma wŭxi i duŭxŭ i yuxŭ rŭ wenaxärŭ maxŭxŭrŭŭ tá nixīgŭ.

16 Rŭ Tupana rŭ wena tá nanade i ngēma Yudíugŭ i ngēxguma yaxōgüägu. Rŭ ngē-maäcŭ tá nixī, yerŭ nuxcŭmaäcŭ ga nanatŭ ga Abráŭ rŭ Tupanaärŭ duŭxŭ nixī. Rŭ ngēmacèx i nataagŭ i Yudíugŭ rŭ Tupanaärŭ duŭxŭgŭ ta nixīgŭ. Rŭ ñoma wŭxi i pãŭ i Tupanana ixäxŭrŭŭ tá nixī. Erŭ ngēxguma ngēma pãŭwa íraxŭ Tupanaärŭ yixīgu, rŭ ngēmawa nŭxŭ tacuèx na guxŭma i ngēma pãŭ rŭ noxrŭ na yīxŭ. Rŭ ngēma wŭxi i nanetŭ i Tupanana ixäxŭrŭŭ tá nixī. Rŭ ngēxguma ngēma nanetŭchumèxã rŭ Tupanaärŭ yixīgu, rŭ ngēmawa nŭxŭ tacuèx na guxŭma i ngēma nanetŭ rŭ noxrŭ na yīxŭ. Rŭ ngēmaäcŭ tá nixī i ngēma Yudíugŭmaã nangupetŭxŭ, erŭ wŭxi i ngunexŭgu rŭ guxŭma i nŭmagŭ rŭ Tupanacèx tá nawoegu.

17 Tupana nŭxŭ naxo ga yema Yudíugŭ ga tama yaxōgüchaŭxŭ. Rŭ ñoma wŭxi i orixchacŭŭ i idaexŭrŭŭ nixī ga yema Yudíugŭxŭ naxoxŭ. Natürŭ nachicŭŭ Tupana pexŭ nade woo tama Yudíugŭ na pixīgüxŭ. Rŭ wŭxi i naixnecŭcŭäx i orixchacŭŭ rŭ orix i toxŭwa yarŭñaxcuchixŭrŭŭ pixīgŭ. Rŭ ñuxma i pema rŭ ta pexŭ nangēxma i pechica i natanŭwa i ngēma duŭxŭgŭ i Tupanaärŭ ixīgüxŭ. Rŭ Tupana rŭ pexŭ narŭngŭxŭē rŭ pexŭ



rü ta namaxêxêê.

<sup>18</sup> Natürü pema i tama Yudíugü na pixíngüxü, rü tama name i pegü picuèxüü rü nüxü pixu na ngêma Yudíugüarü yexera pixíngüxü. Rü ngêxguma chi ngêmaâcü pegü picuèxüügüchaŭgu, rü name nixí i nüxna pecuèxâchie na tama petanüwa ne naxüxü ga Cristu ya pexü maxêxêêcü, natürü Yudíugütanüwa nixí ga ne naxüxü. Rü ngêma Yudíugügagu nixí i Tupana pexü dexü rü pexü namaxêxêêxü i ñuxmax.

<sup>19</sup> Natürü bexmana tá ñaperügügü:

“Tupana rü marü nüxü naxo ga yema Yudíugü rü yemacèx nachicüü tüxü nade”, ñaperügügü tá.

<sup>20</sup> Ngêmaâcü aixcüma nixí ga Tupana nüxü oxü ga yema Yudíugü yerü tama nayaxögü. Rü ngêma na peyaxögüxüçèxicatama nixí i nachicüü Tupana pexü dexü i ñuxmax. Rü ngêmacèx tama name i pegü picuèxüügü. ¡Natürü pexuãégü na tama yema Yudíugüxü üpetüxürüü pexü üpetüxüçèx!

<sup>21</sup> Yerü yema Yudíugü ga noxri Tupanaârü ixíngüxü, rü Tupana nüxü naxo yerü tama nayaxögü. Rü yexguma yemaâcü Tupana nüxü oxgu ga yema duüxügü rü pexü rü tá ta naxo ega täütáma peyaxögüechagu.

<sup>22</sup> Düçèx, na ñuxâcü namecümaxü ya Tupana. Natürü tüxü napoxcu ta ega tama aixcüma yaxögügu. Rü nanapoxcue ga yema duüxügü ga chixexügu yixü, natürü pemaã rü namecüma. Natürü penaxwèxe i guxüguma nüma nanaxwèxexüâcüma pemaxê rü peyaxögü na guxüguma pemaã namecümaêchaxüçèx. Erü ngêxguma tama nüma nanaxwèxexüâcüma pemaxêgu rü tama peyaxögüechagu, rü täütáma

pemaã namecũma. Rũ pexũ rũ tá ta naxo, rũ tá pexũ ínawogũ.

<sup>23</sup> Natũrũ ngẽxguma yaxõgũãgu i ngẽma Yudíugũ i ñuxma maxẽxũ, rũ woo Tupana na nũxũ oxũ ga noxrix, natũrũ wena táxarũ nanade erũ nũxũ nangẽxma i pora na wenaxãrũ nadeãxũcèx ega aixcũma yaxõgũãgu.

<sup>24</sup> Rũ pema na tama Yudíugũ na pixĩgũxũ, rũ tama Tupanaãrũ duũxũgũ pixĩgũ ga noxrix. Natũrũ Tupana pexũ nade na noxrũ pixĩgũxũcèx. Rũ ñuxma na yemaãcũ Tupana pexũ dexũ, rũ ngẽxguma yaxõgũãgu i ngẽma Yudíugũ, rũ Tupana rũ pexũ nadexũãrũ yexera tá nũxũ natauxcha na nadeãxũ i ngẽma Yudíugũ, yerũ woetama norũ duũxũgũchirẽx nixĩgũ ga noxrix.

*Wũxi i ngunexũ rũ guxũma i Yudíugũ tá nanayauxgũ i maxũ i taguma gúxũ*

<sup>25</sup> Pa Chaueneẽgũ i Yaxõgũxũx, nangẽxma i wũxi i ore ga noxri tama duũxũgũxũ nũxũ nacuèxẽẽxũ ga Tupana. Natũrũ chanaxwèxe i nũxũ pecuèx i ngẽma ore na tama nagu perũxĩnũèxũcèx na duũxũgũ i nũxũ cuèxũchixũ pixĩgũxũ, rũ pexicatama Tupana pexũ dexũ. Rũ dũcax, noxretama nixĩ i ngẽma Yudíugũ i aixcũma yaxõgũxũ. Rũ ngẽmaãcũ tá nixĩ ñuxmatáta yaxõgũã i guxũma i ngẽma togũ i duũxũgũ i Tupana dexũ.

<sup>26</sup> Natũrũ ngẽmawena rũ guxũtáma i Yudíugũ rũ tá ta nayaxõgũ, rũ tá nanayauxgũ i maxũ i taguma gúxũ. Erũ Tupanaãrũ ore i ümatũxũwa rũ ñanagũrũ:

“Yima Cristu ya ínanguxŭxēēcü, rü Yudíugütanüwatama ne naxŭ. Rü nüma rü tá Yudíugŭxŭ chixexŭwa ínanguxŭxēē.

<sup>27</sup> Rü aixcüma norü pecaduwa tá íchananguxŭxēē i ngēma Yudíugü. Rü ngēxguma tá nixĩ na aixcüma chayanguxēēxŭ i ngēma chorü uneta ga ũpaxŭchima Abráŭmaã nüxŭ chixuxŭ”, ñanagürü ga Tupana.

<sup>28</sup> Natürü i ñŭxma ya Tupana rü Yudíugŭxŭ nadau na norü uwanügü yĩxŭ erü tama nayaxōgü i ngēma ore i mexŭ. Natürü ngēmaãcü naxüpetü na pexŭ natauxchaxŭcèx na peyaxōgŭxŭ i pema i tama Yudíugü na pixĭgŭxŭ. Natürü nüma ya Tupana rü ñŭxma rü ta ngēma Yudíugŭxŭ nangechaŭ yerü nuxcümaŭgŭxŭ ga norü oxigŭmaã inaxuneta na nüxŭ tá nangŭxēēxŭ.

<sup>29</sup> Rü ngēxguma Tupana rü tacü i mexŭmaã inaxunetagu, rü aixcüma nayanguxēē i ngēma, rü taguma nüxŭ inayarüngüma. Rü ngēxgumarüŭ ta i ngēxguma texécèx nacaxgu, rü taguma nüxŭ inayarüngüma i ngēma.

<sup>30</sup> Rü pema na tama Yudíugü pixĭgŭxŭ, rü ũpa rü tama Tupanaga pexĩnüē. Natürü ñŭxma na tama naga naxĩnüēxŭ i Yudíugü, rü ngēmacèx Tupanaãxŭ pengechaŭtümŭgŭ erü peyaxōgü i pemax.

<sup>31</sup> Rü ngēma pexŭ ngupetŭxŭrŭŭ nixĩ i ngēma Yudíugŭxŭ nangupetŭxŭ. Nümagü rü tama Tupanaga naxĩnüē i ñŭxmax, natürü ngēmaãcü nüxŭ nangupetü na Tupanaãxŭ pengechaŭtümŭgŭxŭcèx, rü nümagü rü ta Tupanaãxŭ nangechaŭtümŭgŭxŭcèx i ñŭxmax.

<sup>32</sup> Yerü nüma ga Tupana rü guxŭma ga

duŭxŭgŭmaã nanaxuegu na chixexŭwa nangëmagŭxŭ nagagu ga norŭ pecadugŭ. Natŭrŭ yemaãcŭ namaã nanaxuegu ga Tupana na nŭxŭ nangechaŭtŭmŭŭgŭxŭcèx i guxŭma i duŭxŭgŭ.

<sup>33</sup> Rŭ namexêchi ya tŭrŭ Tupana, rŭ poraãcŭxŭchima tŭxŭ narŭngŭxêẽ. Rŭ nŭma rŭ nŭxŭ nacuèxŭchi erŭ guxŭxŭma nacuèx. Rŭ yixema rŭ taxucŭrŭwama nŭxŭ tacuèx i tŭxcŭŭ yŭxŭ i tŭxŭ nadexŭ, rŭ taxucŭrŭwama nŭxŭ tacuèx i guxŭma i ngëma naxŭxŭ i nŭmax.

<sup>34</sup> ¿Erŭ texé i tatanŭwa nŭxŭ tacuèx i guxŭma i ngëma tŭrŭ Cori nagu rŭxŭnŭxŭ? ¿Rŭ texé nŭxŭ tacuèx na tŭrŭ Corixŭ taxucŭxêxŭ?

<sup>35</sup> ¿Rŭ texé tŭxira tacŭ rŭ ãmare tŭrŭ Corina taxã, na yixcama nŭxŭ tacŭmaã tŭxŭ nataeguxêẽaxŭcèx?

<sup>36</sup> Erŭ guxŭma i tacŭ ingëxmaxŭ rŭ Tupanaxŭtawa ne naxŭ. Rŭ nŭma nixŭ ga naxŭãxŭ ga guxŭma na noxrŭ yŭxŭcèx. Rŭ name nixŭ i guxŭguma nŭxŭ ticuèxŭŭgŭ rŭ tanataxêẽ. Rŭ ngëmaãcŭ yŭ.

## 12

*Pexŭ chacèxŭ na pegŭtama Tupanana pexãgŭxŭ na wŭxi i ãmare i maxŭxŭ na pixŭgŭxŭcèx*

<sup>1</sup> Rŭ dŭcax, Pa Chaueneëgŭx, ñuxãcŭ Tupana poraãcŭxŭchima tamaã namecŭma. Rŭ ngëmacèx pexŭ chacèxŭ na pegŭtama Tupanana pexãgŭxŭ na wŭxi i ãmare i maxŭxŭ na pixŭgŭxŭcèx. Rŭ ngëma ãmare nixŭ i aixcŭma napëxewa ŭnŭnexŭ rŭ namaã nataãèxŭ. Rŭ ngëmaãcŭ nixŭ ya Tupana i nanaxwèxexŭ na nŭxŭ picuèxŭŭgŭxŭ.

<sup>2</sup> Rŭ tama name i ñoma i naãnecŭãx i duŭxŭgŭcŭmagu pexŭ. Natŭrŭ name nixŭ

i Tupanana pegü pexāgü na nūma pexū naxūchicüüxūcèx rü ngexwacaxūxū i peã pexū ngēxmaxūcèx rü ngēmaācū naxcèxicatama pemaxēxūcèx. Rü ngēmaācū tá nūxū pecuèx i tacū nixī i Tupana pexū naxwèxexū na penaxūxū, rü tacū nixī i aixcūma mexū i napēxewa, rü tacū nixī i namaã nataãxū.

<sup>3</sup> Rü Tupana ya chomaã mecūmacü, rü choxū namu na pemaã nūxū chixuxūcèx i guxāma i pema na tama namexū na texé i petanūwa tūgü írütaxū rü tūgūgu tarūxīnūxū na togüarü yexera tīxū. Natürü name nixī na wūxichigü meã tūgü ngugüarü maxūāxū rü tūgūgu rūxīnūxū na ñuxācū Tupana tūxna naxāxū i tūmaārü cuèx wūxigu namaã i tūmaārü õ.

<sup>4</sup> Rü dücax, rü taxūnewa nangēxma i taeru rü tachacüügü rü taparagü rü muxūma i to i taxūneārü ngēmaxūgü. Rü wūxichigü i ngēma taxūneārü ngēmaxūgü rü nūxū nangēxma i noxrütama puracü.

<sup>5</sup> Rü ngēxgumarūū ta i yixema na yaxōgūxū, rü woo na imuxū natürü wūxitama i duūxūgü tixīgü, erü Cristuarü duūxūgü tixīgü. Rü ngēmacèx i guxāma i yixema rü yigümücügü tixīgü, erü woetama wūxitama i duūxūgü tixīgü.

<sup>6</sup> Rü wūxichigü i yixema, rü Tupana tūxna nanaxā i tórü cuèx i nūma nanaxwèxexū na tūxū nangēxmaxū. Rü tanaxwèxe i meāma nagu taxī i ngēma cuèx i Tupana tūxna āxū. Rü ngēxguma tūxna naxāāgu i tórü cuèx na norü orearü uruū ixīgūxūcèx, rü name nixī i ngēma õ i tūxū ngēxmaxūmaã tanaxü i ngēma puracü.

<sup>7</sup> Rü ngēxguma tūxna naxāāgu i tórü cuèx na

togūxŭ rŭngŭxēēgŭxŭcèx, rŭ name nixī i meāma tanaxŭ i ngēma. Rŭ ngēxguma texéna naxāāgu i tŭmaārŭ cuèx na togūxŭ tangúexēēxŭcèx, rŭ name nixī i meāma tanaxŭ i ngēma.

<sup>8</sup> Rŭ yíxema nŭxŭ cuáxe na Tupanaārŭ oremaā togūxŭ tataāēxēēxŭ, rŭ name nixī i meāma tanaxŭ i ngēma. Rŭ yíxema nŭxŭ cuáxe na togŭmaā tangauxŭ i tŭmaārŭ ngēmaxŭ, rŭ name nixī i tŭmaārŭ ngúchaŭmaā tanaxŭ i ngēma. Rŭ yíxema āēxgacŭ ixīxē rŭ name nixī i meāma tayanguxēē i ngēma puracŭ. Rŭ yíxema nŭxŭ cuáxe na togŭ tŭxŭ ngechaŭtŭmŭŭgŭxŭ, rŭ name nixī i taāēācŭma tanaxŭ i ngēma.

*Ñuxācŭ nanaxwèxe na namaxēxŭ i duŭxŭgŭ i Cristuaxŭ yaxōgŭxŭ*

<sup>9</sup> Rŭ name nixī i aixcŭma meāma pegŭ pengechaŭgŭ i wŭxichigŭ. ¡Rŭ nŭxŭ pexo i guxŭma i tacŭ i chixexŭ ixīxŭ! ¡Rŭ nagu pexī i ngēma aixcŭma mexŭ ixīxŭ!

<sup>10</sup> Rŭ name nixī i wŭxichigŭ pegŭ pengechaŭgŭ, ñoma pegŭeneēxŭchixŭ pengechaŭxŭrŭŭ. Rŭ name nixī i naxcèx pedaugŭ na ñuxācŭ peeneēgŭxŭ petaxēēxŭ rŭ ñuxācŭ pegŭ perŭngŭxēēxŭ.

<sup>11</sup> Rŭ tama name i cuxo ega tacŭ rŭ puracŭ cuxŭ namŭxgu ya tórŭ Cori. Natŭrŭ name nixī i curŭ ngúchaŭmaā cunaxŭ i norŭ puracŭ.

<sup>12</sup> Rŭ name nixī i petaāēgŭ erŭ ipenanguxēē na Tupanaxŭtawa pengugŭxŭ. Rŭ ngēxguma tacŭ rŭ ngúxŭ pexŭ ngupetŭgu, rŭ name nixī i yaxna namaā pexīnŭē. ¡Rŭ tama name i nŭxŭ perŭchaue na peyumŭxēgŭxŭ!

13 Rū ngēxguma nūxū pedèuxgu na tacū nūxū taxuxū i ngēma togū i yaxōgūxū, rū name nixī i nūxū perūngūxēē. ¡Rū meā penayaxu i ngēma duūxūgū i pexūtagu naxīānexū!

14 Rū ngēxguma chi texé chixri pemaā ūpetūgu, rū name nixī i tūmacèx peyumūxēgū na meā tūxū naxūpetūxūcèx. Rū ngēmaācū name nixī i Tupanana tūmacèx peca na tūxū nangūxēēxūcèx rū tama tūxū napoxcuxūcèx.

15 ¡Rū wūxigu tūmamaā petaāēgū ya yíxema taāēgūxe! ¡Rū wūxigu tūmamaā pexauxe ya yíxema ngechaūgūxe rū auxexe!

16 ¡Rū meā pegū pengechaūgū i wūxichigū! ¡Rū tama pegū picuèxūūgū! ¡Rū namaā pegū pewūxiguxēē i ngema tama nūgū icuèxūūgūxū! ¡Rū tama pegūgu perūxīnūē na togūarū yexera nūxū cuèxūchigūxū na pixīgūxū!

17 Rū ngēxguma texé chixexū pemaā ūxgux, ¡rū tāūtáma chixexūmaā pexūtanū! Natūrū name nixī i naxcèx pedau na mexū pexūxū i guxū i duūxūgūpēxewa.

18 ¡Rū naxcèx pedau na guxūma i duūxūgūmaā meā pemaxēxū rū namaā na iperūngūxmūxūcèx i guxūguma!

19 Pa Chaueneēgū ya Pexū Changechaūgūxe, tama name i pegūtama pexūtanū ega texé tacū rū chixexū pemaā ūxgu. Natūrū name nixī i Tupanamēxēgu penaxū i ngēma na nūma napoxcuāxūcèx. Erū Tupanaārū ore i ūmatūxūwa rū ñanagūrū:

“Rū choxmēxwa nangēxma na duūxūgūxū chapoxcuxū i norū chixexūcèx. Rū choma

tá nüxŭ chanaxütanü i ngēma duŭxŭ i chixexŭ üxŭ”,  
ñanagürü ya tórü Cori.

<sup>20</sup> Rŭ ngēxguma tacü rŭ chixexŭ cumaã naxŭxgu i togü, rŭ tama name i chixexŭmaã cunataeguxēē. Natürü name nixŭ i nagu quixŭ i Tupanaärü ore i ñaxŭ,

“Rŭ ngēxguma curü uwanü taiyèxgu, jrŭ nachibüxēē! Rŭ ngēxguma yařawaxgu, jrŭ naxaxexēē! Erü ngēxguma ngēmaãcü cunaxŭxgu, rŭ poraãcü tá cunaxãnexēē”,

ñaxŭ.

<sup>21</sup> Rŭ ngēxguma togü chixexŭ cumaã üxgux, rŭ name nixŭ i cuxuãē na tama chixexŭgu cun-guxŭcèx. Rŭ name nixŭ na mexŭ cuxŭxŭ namaã i ngēma duŭxŭ. Rŭ ngēmaãcü tá icuyanaxoxēē i ngēma chixexŭ i cumaã naxŭxchaŭxŭ.

## 13

<sup>1</sup> Rŭ name nixŭ i guxŭma i duŭxŭgü rŭ meã nórü ãëxgacüga naxŭnŭē. Erü Tupana nixŭ ya nüxŭ unetacü i guxŭma i ãëxgacügü. Erü nataxuma i ãëxgacü i tama Tupana ingucuchixēēxŭ.

<sup>2</sup> Rŭ ngēmacèx, texé ya tama tümaärü ãëxgacüga ñnüchaŭxē, rŭ Tupanaga nixŭ i tama taxŭnŭxŭ. Rŭ yixema tama naga ñnüēchaŭxē, rŭ tá tapoxcue.

<sup>3</sup> Erü ngēma ãëxgacügü rŭ tama ngēma mexŭ ügŭxŭärü poxcuruŭ nixŭ, natürü ngēma chixexŭ ügŭxŭärü poxcuruŭ nixŭ. Rŭ ngēxguma cunaxwèxegu na tama nüxŭ cumuŭxŭ i wüxi i ãëxgacü, rŭ name nixŭ i meã cumaxŭ. Rŭ nüma i ãëxgacü rŭ tá cumaã nataãē.



4 Erü nüma i ãëxgacü rü Tupanaãrü ngüxëeruü nixĩ rü ngëmacèx nanamu na cuxü nangüxëëxücèx. Natürü ngëxguma chixri cumaüxgu, rü ngëxguma tá waxi nixĩ i nüxü cumuüxü. Erü nüma i ãëxgacü rü tama natücèxma nixĩ na nüxü nangëxmaxü i pora na cuxü napoxcuxü. Erü woetama Tupana nanamu na napoxcuãxücèx i ngëma duüxü i chixri maxüxü.

5 Rü ngëmacèx name nixĩ i naga cuxĩnü i curü ãëxgacügü. Rü tama ngëma poxcuxü na cumuüxücèxicatama nixĩ i namexü na naga cuxĩnüxü, natürü name nixĩ i naga cuxĩnü erü marü nüxü cucuèx na namexü i ngëma.

6 Rü ngëmacèx name nixĩ i meã nüxü penaxütanü i ngëma dïëru i perü ãëxgacügücèx ixixü i ngëma nümagü nagu naxunetaxüëxpüx na nüxü penaxütanüxücèx. Erü ngëma ãëxgacügü rü Tupanaãxü nixĩ i napuracüxü i ngëxguma naxüãgu i ngëma puracü na pemaã inacuáxü.

7 Rü wüxichigü i ngëma ãëxgacügü, rü name nixĩ i nüxna penaxã i ngëma nüxna üxü. ¡Rü nüxü penaxütanü i ngëma dïëru i perü ãëxgacügü nagu unetaxüëxpüx na nüxü penaxütanüxü! ¡Rü penaxüx i ngëma ãëneãrü puracü i perü ãëxgacügü pexü muxü na penaxüxücèx! ¡Rü nüxü pengechaügü rü naga pexĩnüë i ngëma perü ãëxgacügü! Erü ngëmaãcü nixĩ i namexü na penaxüxü.

8 Rü tama name i texéaxü tacü pengetanü. Natürü nangëxma i wüxitama i ngetanü i taguma tüxü ingutanüxü. Rü ngëma nixĩ na yigü ingechaügüxü. Rü ngëmacèx ya yixema aixcüma tümamücüxü ngechaüxë rü marü tayanguxëë i guxüma i ngëma Tupana tüxü muxü.

9 Rū ñanagürü i Tupanaärü mugü:

“¡Rü täütáma naĩ i ngemaã icupe! ¡Rü täütáma cumáêta! ¡Rü täütáma cungĩx! ¡Rü täütáma toguãxãrü ngẽmaxũ cuxũ nangúchaũ!”

ñanagürü. Natürü ngẽma mugü rü guxũma i togü i Tupanaärü mugümaã rü wüxigu nanu nagu i norü ore i ñaxũ:

“¡Rü nüxũ nangechaũ i cumücü na cugütama cungechaũxürüũ!”

ñaxũ.

10 Rū yíxema tümamücüxũ ngechaũxẽ, rü taxuũma i chixexũ namaã taxü. Rū ngẽmacèx i ngẽxguma tamücüxũ ingechaũgu, rü aixcüma tayanguxêe i Tupanaärü mugü.

11 Rū name nixĩ i tanaxü i guxũma i ngẽma, erü ñomaücüü rü nangẽxma i muxũma i guxchaxũgü. Rū name nixĩ i pegü ípemexêe rü paxa penaxü i tórü Coriarü puracü. Erü ñuxma rü noxri yaxõgüguarü yexera ningaicamachigü i ngẽma ngunexũ i nagu tá taxcèx nataeguxũ ya tórü Cori.

12 Rū woo na naporaxũ i Chataná i ñoma i naãnewa i ñuxmax, natürü paxa tá nagux i ngẽma, rü paxa tá ínangu ya Cristu na nügüxütawa tüxũ nagagüxücèx. Rū ngẽmacèx name nixĩ i nüxũ tarüxoe i guxũma i chixexũ ixügüxũ. Rū ñuxma na nüxũ icuáxũ i Tupanaärü ore, ¡rü ngĩxã yigüna tadaugü na tama nagu iyixücèx i tacü rü chixexũgü! ¡Rü ngĩxã meã tamaxê na ngẽmaãcü nüxũ rüyexeragüxücèx i guxũma i chixexũ!

13 ¡Rü ngĩxã mexũ taxügü rü meã tamaxê! Erü aixcüma Cristuarü duũxũgü tixĩgü, rü tanaxwèxe i nüma nanaxwèxexũãcüma tamaxê. Rū tama name na ingãxèxũ rü na naxügüxũ i petagü i chixexũ

i duŭxŭgŭ nawa ãŭgatanŭxŭ. Rŭ tama name i tingēãemare rŭ ěxna to i chixexŭ taxŭgŭ, rŭ bai na yigŭ ichoxŭgagŭxŭ, rŭ bai i togŭchi ixaïexŭ naxcèx i norŭ ngēmaxŭgŭ.

<sup>14</sup> Natŭrŭ name nixŭ i nacŭmagu pexŭ ya tŏrŭ Cori ya Ngechuchu ya Cristu, rŭ nŭxna naxcèx peca na pexŭ nangŭxēxŭcèx na meã naxcèx pemaxēxŭcèx. Rŭ tama name i naxcèx pedaugŭ na ñuxãcŭ pexeneãrŭ ngŭchaŭ na pexŭgŭxŭ.

## 14

### *Tama name i nŭxŭ quixu i cueneẽ i yaxŏxŭ*

<sup>1</sup> Rŭ ngēxguma petanŭgu naxãxchaŭgu i wŭxi i peeneẽ i tama perŭŭ meã Tupanaãrŭ orexŭ cuãxŭ, rŭ name nixŭ i meã penayaxu. Natŭrŭ tama name i namaã pegŭ pechoxŭga naxcèx i nacŭmagŭ i nagu yaxŭxŭ i Tupanapēxewa.

<sup>2</sup> Rŭ dŭcax, nangēxma i ñuxre i taeneẽgŭ i nagu rŭxŭnŭxŭ na namexŭ na guxŭraŭxŭ i ŏna nangŏxgŭxŭ. Natŭrŭ nangēxma i togŭ i taeneẽgŭ i tama aixcŭma meã Tupanaãrŭ orexŭ cuèxgŭxŭ i tama namachi ngŏxgŭchaŭxŭ. Rŭ nŭmagŭ nŭxŭ nacuèxgŭgu rŭ Tupanapēxewa nachuxu na ƭacŭ rŭ namachi nangŏxgŭxŭ, rŭ ngēmacèx nixŭ i nabŭ rŭ orixgŭxicatama nangŏxgŭxŭ.

<sup>3</sup> Rŭ ngēxguma tangēxmagu ya texé ya namachi ngŏxē, rŭ tama name i nŭxŭ taxŏox i ngēma togŭ i duŭxŭgŭ i tama namachi ngŏxgŭxŭ. Rŭ ngēxgumarŭŭ ta ya yixema tama namachi ngŏxē, rŭ tama name na nŭxŭ tixuxŭ i ngēma duŭxŭgŭ i namachi ngŏxgŭxŭ, erŭ nŭmagŭ rŭ ta Tupanaãrŭ duŭxŭgŭ nixŭgŭ.

<sup>4</sup> ¿Rü texé quixĩ i cuma rü ngẽmacèx nüxũ quixu i to i coriarũ duũxũgũ? Rü dücax, pemaã nüxũ chixu rü ngẽma norũ cori tá nixĩ i nangugũxũ rü ngoxi mexũ naxũx i ngẽma norũ duũxũ, rü ěxna tama. Rü ngẽma duũxũ rü Tupanapẽxewa rü tá name, erũ nüma ya tórũ Cori ya Cristu rü nüxũ nangẽxma i pora na nügücèx namexẽẽãxũ i ngẽma duũxũ.

<sup>5</sup> Rü dücax, nangẽxma i ñuxre i duũxũgũ i nagu rüxĩnüẽxũ na ngũxchigaarũ ngunexũ rü togũ i ngunexũârũ yexera namexũ na nagu Tupanaxũ yacuèxüũgũxũ. Rü nangẽxma i togũ i duũxũgũ i nagu rüxĩnüẽxũ na guxũma i ngunexũgũ rü nawũxiguxũ i Tupanapẽxewa. Natürũ wũxichigũ i yixema rü tanaxwèxe i meã taãewa nüxũ tacuèx na aixcũma Tupanapẽxewa namexũ i ngẽma taxũxũ rü tixõxũ.

<sup>6</sup> Rü yixema duũxẽ ya tacũ rü ngunexũ Tupanacèx íxũxũchixe, rü ngẽmaãcü tanaxũ na ngẽma ngunexũgu tórũ Corixũ ticuèxüũxũcèx. Rü yixema namachi ngõxẽ, rü ngẽmaãcü tanangõx na tórũ Corixũ ticuèxüũxũcèx, rü Tupanana moxẽ taxã naxcèx i ngẽma tangõxũ. Rü yixema tama namachi ngõxẽ, rü ngẽmaãcü tanaxũ na tórũ Corixũ ticuèxüũxũcèx, rü tüma rü ta Tupanana moxẽ taxã naxcèx i ngẽma nabũ i tangõxũ.

<sup>7</sup> Rü ñuxma na ñoma i naãnewa imaxẽxũ, rü taxúema tügücèxtama tamaxũ rü ěxna tügücèxtama tayu.

<sup>8</sup> Erũ ñuxma na imaxẽxũ, rü tórũ Coriarũ ngúchaũ na ixügũxũcèx nixĩ i imaxẽxũ. Rü ngẽxguma iyuegu, rü ngẽma rü ta tórũ Corimẽxẽwa nangẽxma. Rü ngẽmaãcü nüxũ tadau rü woo

imaxēgu rü ēxna woo iyuegu, rü tórü Coriarü duūxūgü tixīgü, rü namēxwa tangēxmagü.

<sup>9</sup> Rū yemacèx nixī ga nayuxū ga Cristu rü wenaxārü namaxūxū na tūmaārü Cori yīxūcèx ga guxāma ga guxema yaxōgūxe ga marü yuexe rü guxāma ya yīxema yaxōgūxe ya ñuxma rü ta maxēxē.

<sup>10</sup> Rū ngēmacèx Pa Chaueneēx, ¿rū tūxcūū i nūxū quixuxū i cueneē i yaxōxū? Rū cumax, Pa To i Chaueneēx, ¿rū tūxcūū i nūxū cuxoxū i cueneē? Erü guxātāma i yīxema rü Tupanapēxewa tá tangugü na nūma tūxū nangugūxūcèx rü ngoxi ime rü ēxna tama.

<sup>11</sup> Erü Tupanaārü ore i ümatūxūwa rü ñanagürü ya tórü Cori:

“Ngēma aixcūma na chamaxūxürüū tá ta nixī i aixcūma guxūtāma i duūxūgü chopēxegu caxāpūxūgūxū, rü guxūtāma choxū icuèxūgūxū”,

ñanagürü.

<sup>12</sup> Rū ngēmaācū nūxū tacuèx na wūxichigü i yīxema rü aixcūma tá Tupanapēxewa na ingugūxū na namaā nūxū ixuxūcèx na ñuxācū imaxēxū rü tacü na ixūxū.

*Tama name i chixexūgu cunanguxēē i cueneē i yaxōxū*

<sup>13</sup> Rū ngēmacèx nixī, Pa Chaueneēgūx, i tama namexū na tamücūgūxū ixuechaū. Natürü narümemaē nixī i nūxū perūxoe i guxūma i tacü i peeneēgūxū pecadugu yixēēxū rü ēxna norü õxū chixexēēxū.

<sup>14</sup> Choma nūxū chacuèx rü nataxuma i õna i Tupanapēxewa chixexū. Rū aixcūmaxūchi nūxū

chacuèx i ngēma erü tórü Cori ya Ngechuchu ya Cristuarü duūxū chixī, rü nūma choxū nūxū nacuèxēē i ngēma. Natürü ngēxguma chi texé nagu rüxīnūgu na tama Tupanapēxewa namexū i ṭacū rü ōna na tangōxū, rü name nixī i noxtacūma tama na tanangōxū ega nagu tarūxīnūgu na tama namexū i ngēma.

<sup>15</sup> Rū ngēxguma ngēma cungōxūcèx tūmaāēwa cunanguxēēgu ya cueneē, rü cumaā nūxū chixu rü tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rü tūxū icuyarūtauxēē ya yíxema cueneē ya Cristu tūmacèx yuxe.

<sup>16</sup> Rū ngēmacèx, woo cuxcèx namexgu i ngēma cuxūxū, natürü tama name na cunaxūamaxū ega ngēmacèx togū tá cuxū ixuxgu na pecadu yīxū i ngēma cuxūxū.

<sup>17</sup> Rū ngēma Tupanapēxewa na imexūcèx rü tama ṭacū rü ōna na ingōxū rü ēxna ṭacū rü axexū na ixaxūxūgagu nixī. Natürü napēxewa na imexūcèx rü tanaxwèxe i Naāē i Ūnēxūārū ngūxēēmaā meā tayanguxēē i ngēma Tupana naxwèxexū rü yigūmaā itarūngūxmūē rü aixcūma tataāēgū napēxewa ya Tupana.

<sup>18</sup> Rū yíxema ngēmaācū Cristucèx maxūxē, rü Tupana rü tūmamaā nataāē, rü guxūma i duūxūgū rü ta tūmamaā nataāēgū.

<sup>19</sup> Rū ngēmacèx, jngīxā naxcèx tadaugū i guxūma i nacūma i mexū i yigūmaā tūxū rūngūxmūēxēxū! jRū ngīxā yigū tarūngūxēē na yexeraācū iyaexūcèx i tórü ōwa rü Tupanaārū orewa!

<sup>20</sup> Rū tama name i ṭacū rü ōna na cungōxūgagu icuyanax-oxēē i Tupanaārū puracū i cueneēārū

maxŭwa. Rŭ aixcŭma nixĩ i guxŭma i ōnagŭ i namexŭ i Tupanapēxewa. Natŭrŭ wŭxi i chixexŭ nixĩ ega ngēma ōna i ingōxŭgagu chixexŭgu nayixēēgu i taeneēgŭ.

<sup>21</sup> Rŭ ngēmacèx tama name i cunangōx i namachi, rŭ ēxna cuyaxaxŭ ya binu, rŭ ēxna cunaxŭ i tacŭ i to, ega ngēmagagu chixexŭgu cunanguxēēgu i cueneē i yaxōxŭ.

<sup>22</sup> Rŭ ngēxguma cuma nagu curŭxĩnŭgu na namexŭ na cunangōxŭ i ngēxŭrŭxŭmare i ōna, rŭ Tupanapēxewa rŭ name nixĩ i cuxicatama nŭxŭ cucuèx i ngēma. Rŭ tataãē ya yixema tŭmaãēwa nŭxŭ cuáxe na Tupanapēxewa namexŭ i ngēma taxŭxŭ.

<sup>23</sup> Natŭrŭ ngēxguma wŭxie nagu rŭxĩnŭgu na tama namexŭ i Tupanapēxewa na tacŭ rŭ ōna na tangōxŭ, rŭ pemaã nŭxŭ chixu rŭ chixexŭ taxŭ ega tanangōxomagŭ, erŭ tŭmaãēwa nagu tarŭxĩnŭ na tama aixcŭma namexŭ i ngēma taxŭxŭ. Rŭ guxŭma i ngēma tŭmaãēwa nagu tarŭxĩnŭxŭ na nachixexŭ rŭ aixcŭma pecadu taxŭ ega tanaxŭamagu.

## 15

### *Name nixĩ i cumŭcŭxŭ cutaãxēxēē*

<sup>1</sup> Rŭ yixema na iporaexŭ i tŕrŭ ōwa, rŭ name nixĩ i nŭxŭ tarŭngŭxēē i ngēma tamŭcŭgŭ i turaexŭ i norŭ ōwa. Rŭ tama name i yigŭguxicatama tarŭxĩnŭē rŭ tŕxrŭcèxicatama tadaugŭ.

<sup>2</sup> Natŭrŭ wŭxichigŭ i yixema rŭ name nixĩ i taeneēãxŭ tanangŭchaŭxēē na ngēmaãcŭ nŭxŭ rŭngŭxēēxŭcèx na yexeraãcŭ yaxōxŭcèx.

<sup>3</sup> Yerü woo ga Cristu rü tama noxrütama ngúchañ naxü. Natürü nayanguxêê ga yema Tupanaärü ore ga ñaxü:

“Pa Chaunatüx, rü ngêma duñxügü i cumaã guxchigagüxü, rü chomaã nixĩ i naguxchigagüxü”,

ñaxü.

<sup>4</sup> Rü guxüma ga yema nuxcüma ümatüxü ga Tupanaärü orewa, rü naxümatü na tüxü nanguxêêxücèx na taguma nüxü rüxoexü ega woo tacü rü guxchaxü tüxü üpetügu. Rü yema Tupanaärü ore rü naxümatü na tüxü nataãêxêxücèx rü tüxü nüxü nacuèxêêxücèx na aixcüma Tupanaärü ixīgüxü.

<sup>5</sup> Rü Tupana nixĩ ya tüxü rüngüxêêcü na yaxna namaã ixĩnüèxücèx i guxüma i guxchaxügü. Rü nüma nixĩ i tüxü nataãêxêxü. Rü chanaxwae i nüma ya Tupana pexü narüngüxêê na aixcüma ngêma Cristu pexü naxwaexüâcüma pemaxêxü.

<sup>6</sup> Rü chanaxwêxe na ngêmaâcü pemaxêxü na guxâma i pema rü wüxigu nüxü picuèxüügüxücèx ya Tupana ya Nanatü ya tórü Cori ya Ngechuchu ya Cristu.

*Duñxügü i tama Yudügü ixīgüxümaã nüxü nixu i ore i mexü*

<sup>7</sup> Rü ngêmacèx, yema Cristu pexü na dexürüü rü name nixĩ i wüxichigü meã pegü peyaxu na ngêmaâcü Tupanaxü yacuèxüügüxücèx i duñxügü.

<sup>8</sup> Rü pemaã nüxü chixu rü Cristu núma naxü na Yudügüxü yanangüxêêxücèx, na yemaâcü yan-guxêêxücèx ga yema uneta ga nuxcümaügüxü ga tórü oxigümaã nüxü yaxuxü ga Tupana. Rü



yemaãcü ga Cristu rü tüxü nüxü nadauxëë na aixcümacü na yïixü ya Tupana rü aixcüma yanguxëëãxü i ngëma norü uneta.

<sup>9</sup> Rü yexgumarüü ta ga Cristu rü núma naxü naxcèx i ngëma duüxügü i tama Yudíugü ixīgüxü na nümagü rü ta Tupanaxü yacuèxüügüxcèx naxcèx na poraãcü Tupanaãxü nangechaütümüügüxü. Rü yemachiga nixi ga yema Tupanaãrü ore ga Dabí ümatüxü ga ñaxü:

“Rü ngëmacèx guxü i nachiuñanecüãx i duüxügüpëxewa tá cuxü chicuèxü. Rü tá chorü wiyawa cuxü chataxëë”,

ñaxü.

<sup>10</sup> Rü toxnamana i Tupanaãrü ore i ümatüxüwa rü ñanagürü:

“Pa Duüxügü i Tama Yudíugü Ixīgüxü, rü name nixi i pema rü wüxigu chorü duüxügü i Yudíugümaã petaãëgü”,

ñanagürü.

<sup>11</sup> Rü toxnamana, rü ñanagürü ta:

“Pa Duüxügü i Tama Yudíugü Ixīgüxü, rü name nixi i nüxü picuèxüügü ya tórü Cori. Rü Pa Guxüma i Nachiuñanecüãx i Duüxügüx, rü name nixi i penataxëë”,

ñanagürü.

<sup>12</sup> Rü Ichaxía rü ta nanaxümatü rü ñanagürü:

“Rü Dabí nanatü ya Ichaiwa tá ne naxü i wüxi i nataa i tá Cristu ixixü. Rü nüma tá nixi i norü aëxgacü yïixü i guxüma i ngëma duüxügü i tama Yudíugü ixīgüxü. Rü ngëma duüxügü rü tá aixcüma nüxü nayaxögü rü tá ínananguxëëgü na yimagagu Tupana nüxü rüngüxëëgüxü”,

ñanagürü.

13 Rū ñuxma i pema na nüxŭ peyaxōgŭxŭ rü chanaxwèxe i poraãcŭ pexŭ nataãêxêê ya yima Tupana ya pexŭ rüngŭxêêcŭ na meã Cristuxŭ ípenanguxêêgŭxŭcèx. Rŭ ngêmaãcŭ i Tupanaãê i Üünexŭ rü tá pexŭ naporaexêê na yexeraãcŭ Cristuxŭ ípenanguxêêgŭxŭcèx.

14 Pa Chaueneêgŭx, meãma nüxŭ chacuèx na guxŭ i duŭxŭgŭmaã pemecŭmaxŭ, rü aixcŭma Tupanaxŭ na pecuáxŭ, rü aixcŭma meãma pegŭ pixucuxêgŭxŭ.

15 Natürü ñaã poperawa rü meãma pexcèx chanaxumatŭ i ñuxre i Tupanaãrŭ ucuxêgŭ, erŭ tama chanaxwèxe i nüxŭ ipeyarüngŭmaê. Rŭ tama chamuŭ na pexcèx chanaxumatŭxŭ i ngêmachiga yerŭ Tupana nixŭ ga choxŭ mucŭ na pemaã nüxŭ chixuxŭcèx.

16 Rŭ nüma nixŭ ga choxŭ namuxŭ na Ngechuchu ya Cristuarŭ puracŭ chaxŭxŭcèx i natanüwa i ngêma duŭxŭgŭ i tama Yudíugŭ ixígŭxŭ. Rŭ ngêma puracŭ ga nawa choxŭ namuxŭ nixŭ na ngêma duŭxŭgŭmaã nüxŭ chixuxŭ i ore i mexŭ na Tupanaxŭtawa chanagagŭxŭcèx, na wŭxi i âmare i Tupana namaã taãêxŭ i ngêma duŭxŭgŭ i Naãê i Üünexŭ imexêêgŭxŭ.

17 Rŭ ñuxma na Ngechuchu ya Cristuarŭ duŭxŭ na chíxŭ, rü ngêmacèx chataãê namaã i ngêma puracŭ i Tupanaãxŭ chaxŭxŭ.

18-19 Rŭ ñuxma rü yema Cristu chorŭ maxŭwa ŭxŭchigaxŭxŭcatama nixŭ i chixuxŭ. Rŭ nüma nixŭ ga choxŭ nangŭxêêxŭ na Tupanaxŭtawa chana-gagŭxŭcèx ga yema duŭxŭgŭ i tama Yudíugŭ

ixīgüxŭ, na nūmagü rü ta Tupanaga naxĩnüëxüçèx. Rü yemaãcü chorü oremaã, rü chorü puracümaã, rü cuèxruŭgü ga taxŭ ga Tupana üxŭmaã, rü Naãë i Üünexŭärü poramaã Tupanaxŭtawa chanagagü ga yema duŭxŭgü. Rü yemaãcü Yerucharéŭwa rü guxŭwama ñuxmata Ilíricuarü naãnewa meãma chayanguxëë na nüxŭ chixuxŭ ga yema ore i tüxŭ maxëxëëxŭ i Cristuchiga.

<sup>20</sup> Rü yemaãcü chapuracü na nüxŭ chixuxüçèx ga Tupanaärü ore i mexŭ ga ngextá taguma ñuxgu Cristuchigaxŭ ínaxĩnüëxŭwa ga duŭxŭgü. Yerü tama chanaxwèxe ga marü togü nüxŭ íxuxŭwa rü duŭxŭgü marü nüxŭ ícuáxŭwa nüxŭ na chixuxŭ ga yema ore.

<sup>21</sup> Rü yemachiga nixĩ ga Tupanaärü ore ga Ichaxía ümatüxŭ ga ñaxŭ:

“Rü yíxema taguma Cristuchigaxŭ cuèxgüxe, rü taguma nachigaxŭ ñnüëxë, rü tá nüxŭ tacuèxgü i nachiga”,

ñaxŭ.

*Pauru rü Dumawa naxŭxchaŭ*

<sup>22</sup> Rü yema toxnamana na chapuracüxüçèx nixĩ ga taxucürüwa petanüwa chaxŭxŭ woo muëxpüxcünachirëx yéma chaxŭxchaŭ.

<sup>23</sup> Natürü ñuxma na marü chanaguxëëxŭ i ngëma puracü i toxnamana, rü nagu charüxĩnü na petanüwa chaxŭxŭ. Yerü ñuxgumamatama nixĩ ga nagu charüxĩnüëchaxŭ na petanüwa chaxŭxchaŭxŭ.

<sup>24</sup> Rü ngëxguma Españawa chaxŭxgu, rü nagu charüxĩnü na woe pexŭtagu íchidauxŭ. Rü nagu charüxĩnü na ñuxre i ngunexŭ ngëxma petanügu charüxãxŭ. Rü wüxi i chorü taãë tá nixĩ i ngëma.

Rü ngēmawena rü chanaxwèxe i choxü perüngüxëẽ na Españawa chaxüxcèx.

<sup>25</sup> Natürü i ñuxma rü Yerucharéüwa tá chaxü, na ngema chanangexüxcèx i ñuxre i dīeru naxcèx i taeneëgü i ngema ngëxmagüxü.

<sup>26</sup> Erü ngëma taeneëgü i yaxōgüxü i Machedóniãñewa rü Acayaanewa ngëxmagüxü, rü norü ngúchañmaã nagu narüxnüë na ngixü nanutaquëxegüxü i ñuxre i dīeru na ngëmaãcü nüxü nangüxëëgüxcèx i taeneëgü i nüxü nataxuxü i Yerucharéüwa ngëxmagüxü.

<sup>27</sup> Rü ngëma taeneëgü i Machedóniãcüãx rü Acayacüãx rü norü me nixī na ngëmaãcü naxügüãxü. Rü ngëma duüxügü rü aixcüma nüxü nangëxma i norü ngetanü i taeneëgü i Yudiügütanüwa. Erü ngëma taeneëgü i Yudiügügagu nixī i ngëma togü i duüxügütanüwa nanguxü i Tupanaärü ore. Rü ñuxma rü name nixī i ngëma togü i duüxügü rü norü ngëmaxümaã taeneëgü i Yudiügü i yaxōgüxüxü narüngüxëëgü.

<sup>28</sup> Rü ngëxguma chanaguxëëgu i ngëma puracü, rü ngëxguma taeneëgü i Yudiügüna marü ngixü chaxãxgu i ngëma dīeru, rü Españawa tá chaxü. Rü ngëxguma ngëma chaxüxgu, rü tá woe pexütagu íchidau.

<sup>29</sup> Rü nüxü chacuèx rü ngëxguma petanüwa changuxgu, rü wüxigu tá tataãëgü, erü nüma ya Cristu tá tüxü nataãëxëẽ i ngëxguma ngëmaãcü wüxiwa ingëxmagügu.

<sup>30</sup> Pa Chaueneëgüx, tórü Cori ya Ngechuchu ya Cristuégagu, rü ngëma na Naãëärü ngüxëëmaã choxü pengechaüxügagu pexü chacèxü na Tupanana chauxcèx peçaxü i perü yumüxëwa. Rü

ngēmaācū tá choxū perüngūxēē nawa i ñaā puracū i Tupana choxna āxū.

<sup>31</sup> ;Rü Tupanana peça na choxū ínapoxūxúcèx nūxna i ngēma Yudíugū i Yudéaanewa ngēxmagūxū i tama yaxōgūxū! ;Rü nūxna peça naxcèx i ngēma taeneēgū i yaxōgūxū i Yerucharéūwa ngēxmagūxū, na taāēācūma nayauxgūāxúcèx i ngēma díeru i ngēma naxcèx changexū!

<sup>32</sup> Rü ngēmaācū ngēxguma Tupana naxwèxegu, rü taāēācūma petanūwa tá changu, na wūxigu pemaā chataāēxúcèx.

<sup>33</sup> Rü chanaxwèxe na pemaā inaxāūxū ya Tupana ya tūxū taāēxēēcū. Rü ngēmaācū yī.

## 16

*Pauru rü nūxū narūmoxē ga yema duūxūgū ga yaxōgūxū ga Dumawa yexmagūxū*

<sup>1</sup> Rü ñūxma na petanūwa naxūxchaūxū i taeyèx i Febe, rü pemaā ngīxū chixu rü wūxi i taeyèx i mecū iyixī. Erū ngīma rü nūxū irüngūxēē i ngēma yaxōgūxū i Chēcréaarū íānewa ngēxmagūxū.

<sup>2</sup> Rü chanaxwèxe i meā ngīxū peyaxu, naegagu ya tórū Cori ya Ngechuchu, erū ngēma nixī i mexū na penaxūxū namaā i guxūma i yaxōgūxū. Rü chanaxwèxe i guxūma i tacū i ngīxū taxuxūwa rü ngīxū perüngūxēē, erū ngīma rü poraācū togūxū irüngūxēē, rü choxū rü ta irüngūxēē.

<sup>3</sup> ;Rü nūxū perūmoxēgū i Prisila rü Aquiru! Rü nūmagū rü chomücūgū nixīgū i Ngechuchu ya Cristuarū puracūwa.

<sup>4</sup> Rü nūmagū rü āūcūmaxūwa nichocu na chauétūwa nachogūexúcèx, na tama chayuxúcèx

ga chomax. Rū ngēmacèx moxē nūxna chaxã. Rū tama chaxicatama moxē naxcèx nūxna chaxã, natürü moxē nūxna naxãgü ta i guxūma i taeneëgü i yaxōgüxū i tama Yudíugü ixígüxū.

<sup>5</sup> ¡Rü nūxū perümoxëgü ta i guxūma i taeneëgü i Aquirupatawa ngutaquëxegüxū! ¡Rü ngëxgumarüü ta nūxū perümoxëgü ya chomücü ya nūxū changechaücü ya Epenétu! Rū nūma nixí ga nūxíra Cristuaxū yaxōōxū ga Áchiaanewa.

<sup>6</sup> ¡Rü ngíxū perümoxëgü i María ga poraãcü petanüwa Tupanaãxū puracücü!

<sup>7</sup> ¡Rü nūxū perümoxëgü i chautanüxügü i Aüdrúnicu rü Yúniã ga wüxigu chomaã poxcuexū! Rū nūmagü nixí i yatügü i aixcüma Tupana imugüxū i guxūma i yaxōgüxū nūxū ngechaügüxū. Rū nūmagü rü nūxíra chauxüpa Cristuaxū nayaxōgü.

<sup>8</sup> ¡Rü nūxū perümoxëgü ya Aüpriátu ya chomücü ya nūxū changechaücü ya chauxrüü tórü Coriaxū yaxōcü!

<sup>9</sup> ¡Rü nūxū perümoxëgü ya Urubánu ya tomücü ixícü i Cristuarü puracüwa! ¡Rü ngëxgumarüü ta nūxū perümoxëgü ya Estaqui ya nūxū changechaücü!

<sup>10</sup> ¡Rü nūxū perümoxëgü ya Apere ya aixcüma tüxū nūxū dauxëécü na ñuxãcü Cristuaxū yaxōōxū! ¡Rü ngëxgumarüü ta nūxū perümoxëgü i Aritúburutanüxügü!

<sup>11</sup> ¡Rü nūxū perümoxëgü i chautanüxū i Erudiü! ¡Rü ngëxgumarüü ta nūxū perümoxëgü i Narsíchutanüxū i tórü Coriaxū yaxōgüxū!

<sup>12</sup> ¡Rü ngíxū perümoxëgü i Trifena rü Trifocha! Rū ngĩmagü rü tórü Coriaxū ipuracüe. ¡Rü

ngëxgumarüŭ ta ngïxŭ perümoxëgü i taeyèx i Péchida i ngïxŭ ingechaŭgücü! Rû ngïma rû marü poraãcü tórü Coriaxŭ ipuracü.

13 ¡Rû nüxŭ perümoxëgü ya Rufu ya aixcüma meã tórü Coriaxŭ yaxõcü! ¡Rû ngëxgumarüŭ ta ngïxŭ perümoxëgü i naë ga chauerüŭ chomaã ixïcü!

14 ¡Rû nüxŭ perümoxëgü i Achícritu, rû Peregúte, rû Erme, rû Patroba, rû Erma, rû guxŭma i togü i taeneëgü i natanüwa ngëxmagüxŭ!

15 ¡Rû nüxŭ perümoxëgü ta i Firórugu, rû Yúria, rû Neréu, rû naëyèx, rû Oripa, rû guxŭma i togü i taeneëgü i yaxõgüxŭ i natanüwa ngëxmagüxŭ!

16 Rû chanaxwèxe i pegü pengechaŭgüãcüma pegü perümoxëgü i wüxichigü. Rû guxŭma i ngëma yaxõgüxŭ i toxnamana ngëxmagüxŭ, rû pexŭ narümoxëgü.

17 Pa Chaueneëgüx, pexŭ chacèèxŭ na pegüna pedaugüxúcèx nüxna i ngëma duŭxügü i pexŭ itoyechaŭxŭ rû chixexügu pexŭ yixëëgüchaŭxŭ. Erü ngëma duŭxügüarü nguxëëtae rû tama namaã nawüxigu i ngëma nguxëëtae ga noxri peyaxgüxŭ ga yexguma noxri peyaxõgügu. Rû name nixï i noxtacüma nüxna pixïgachi i ngëma duŭxügü rû tama natanügu pexãgü.

18 Erü ngëma duŭxügü rû tama tórü Cori ya Ngechuchu ya Cristuarü ngúchaŭ naxügü, natürü noxrütama ngúchaŭ nixï i naxügüxŭ. Rû ore i tauxchaxügümaã nayaxucuxëgü i duŭxügü, rû ngëmaãcü nanawomüxëëgü i ngëma duŭxügü i tama meã nüxŭ cuèxgüxŭ.

19 Rû guxŭma i duŭxügü nüxŭ nacuèxgü na aixcüma meã Tupanaga pexïnüèxŭ i pemax.

Rü ngēmacèx pemaã chataãe i chomax. Rü chanaxwèxe na meã nüxũ pecuáxũ i tacü nixĩ i mexũ i Tupanapëxewa na penaxüxcèx i ngēma. Natürü ngēma Tupanapëxewa chixexũ, rü jnũxna pixĩgachi na tama nagu peyixüxcèx!

<sup>20</sup> Rü ngēxguma ngēmaãcü meã pemaxēgu rü nüma ya Tanatü ya Tupana ya tüxũ taãexēcũ rü tá pexũ naporaexēe na aixcüma nüxũ perüyexeraxüxcèx i Chataná. Rü chanaxwèxe i tórü Cori ya Ngechuchu ya Cristu pemaã inarüxãüx rü pexũ narüngüxēe.

<sup>21</sup> Rü pexũ narümoxe ya Timutéu ya chomücü ixĩcü i Tupanaãrü puracüwa. Rü ngēxgumarüũ ta pexũ narümoxeü i chautanüxügü i Dúchiu, rü Yachóũ rü Sochípatru.

<sup>22</sup> Rü choma i Téchiu na chanaxümatüxũ i ñaã popera, rü choma rü ta pexũ charümoxe naegagu ya tórü Cori.

<sup>23</sup> Rü pexũ narümoxe ta ya Gayu ya napatawa changēxmacü. Rü nüma rü inanaxã ya daa napata na nawa nangutaquëxegüxcèx i guxũma i yaxögüxũ. Rü ngēxgumarüũ ta pexũ narümoxeü i Eratu i daa ñãneãrü dñeruarü dauruũ ixixũ, rü taenee i Cuartu.

<sup>24</sup> Rü chanaxwèxe i tórü Cori ya Ngechuchu ya Cristu pexũ narüngüxēe i guxãma i pemax. Rü ngēmaãcü yĩ.

*Pauru rü Tupanaxũ yacuëxüũãcüma nanaguxēe i norü popera*

<sup>25-26</sup> jRü ñuxmax, rü ngĩxã nüxũ ticuëxüügü ya Tanatü ya Tupana! Rü nüma nüxũ nangēxma i pora na pexũ naporaexēexüxcèx na meã peyaxögüamaxüxcèx i ngēma norü ore i tüxũ



maxēxēxū tamaã nüxū ixuxürüü. Rū ngēma nixī i ore i guxūwama nüxū chixuxū rü namaã changúexētaexū i Ngechuchu ya Cristuchiga. Rū ngēmatama ore i Cristuchiga rü taxchaxwa naxēxūgu ga noxrix, natürü i ñuxma ya Tupana rü marü tüxū nüxū nacuèxē i ngēma. Rū nuxcüma tauta naãne üxgu rü Tupanaxīcatama nüxū nacuèx ga yema, natürü i ñuxma rü norü orearü uruügu ümatüxū ga orewa taxcèx nanangoxē. Rū ngēma ore rü namaã nawüxigu ga yema ore ga nuxcüma nüxū yaxuxū ga Tupana ya guxūguma maxēchacü. Rū ñuxma ya Tupana rü guxūwama nanamugü i norü orearü uruügu na guxū i duüxügümaã nüxū na yaxugüexücèx i ngēma ore i Cristuchiga na nüxū yaxögüãxücèx rü naga na naxīnüexücèx.

<sup>27</sup> Rū nüma ya Tupana rü nüxīcatama nixī i Tupana yīxū, rü nüxīcatama nixī i guxūxū nacuáxū. jRü ñuxmax, rü ngīxã guxūguma nüxū ticuèxüügu, erü Nane ya Ngechuchu ya Cristu rü poraãcü tüxū narüngüxē! Rū ngēmaãcü yīi.

Rü nuãma pexna,  
Pauru

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6